

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY

MAY 11 1958

T 3140/71483

8

歷城縣志卷第十七

古蹟考四

陵墓

古墓犁為田松柏摧為薪此勢所必至也故採樵之禁自昔嚴之縣之陵墓太甲冢為最古見後漢書志閔子墓乃始見於宋朱雲班超則皆不葬於此今辨之而仍存之者恐其傳聞或有據也表誌諸文多畚廢壤而得之更閱數百年其存亡不可知矣具載之以備故實

商

太甲陵

哈佛大學漢和
圖書館珍藏印

皇覽太甲有冢在歷山上

見漢書

按舊志與漢書不同詳見山水考

周

鮑叔牙墓

城冢記云縣東三十里有鮑山山下有城鮑叔牙食

邑也相傳叔牙與管仲分金於此鮑叔墓在焉

天下名勝

志

田雯拜叔牙墓詩崑崙松路深迢遞成孤往雨濕烏

角巾花沾紅藤杖遺跡不可尋但聽樵唱響

古歡堂集

閔子子騫墓

閔子墓濟南府城東門外五里又濰州昌邑西北子

騫阜上古亦有廟濮州范縣又云有墓未詳

齊乘

石槨傳者謂在華山前黃郡守濬河掘出閔子石棺

盛其首移之高原今華山下石槨尚存

舊志

田雯拜閔子墓詩菰蘆花未吐菱荷葉已香日夕下

山椒歸鴉亂迴翔石椁在溪側無風響白楊

古歡堂集

漢

酈食其墓在郡城西天懸寨之左

音齊

按陸通志酈生墓在章邱縣北臨濟鎮西

千伯墓

元帝初元四年皇后曾祖父濟南東平陵王伯墓門

梓柱卒生枝葉上出屋孟康曰王伯莽之祖師古曰莽高祖父故下云高祖考卒

也當漢九世火德之危而有此祥興於高祖考之門

門為開通梓猶子也言王氏當有賢子開通祖統起

於柱石大臣之位受命而王之符也漢書五行志

時上無繼嗣政由王氏出災異浸甚向上封事極諫

曰孝昭帝時冠石立於泰山仆柳起於上林而孝宣

帝即位今王氏先祖墳墓在濟南者其梓柱生枝葉

扶疎上出屋根垂地中雖立石起柳無以過此之明

也漢書劉向傳

朱雲墓古平陵南舊志

按漢書朱雲魯人徙平陵從博士白子友學易自上

書折檻後不復仕卒葬平陵東郭觀此當是扶風郡

之平陵也舊志載東平陵下又云墓上生草如劍名

指佞草佞人過之草必搖動姑仍之岳通志

夏侯勝墓古平陵東門外舊志

勝東平人官長信少府岳通志

班超墓在府城西三里陸通志

班超冢寰宇記云在長清東北二十五里定遠扶風

平陵人以和帝永元十四年八月徵還洛陽九月卒
齊地曷為有墓豈以齊有東平陵而附會之耶齊乘

按後漢書班超傳超卒年七十一朝廷愍惜使者
弔祭贈賵甚厚無葬於濟南之文齊乘辨之良允
陸通志云在城西南三里殆襲寰宇記而更誤矣

劉衡墓

漢趙相劉衡碑君諱衡字元宰濟南東平陵人也厥
先尚矣聖漢龍興下闕王爰啟奠土遷於岱陰自康
侯以來弈世本承君允闕頌之純闕下炎闕之運時
放依下闕相王闕二字其束乎藻發於成就慕周行

而彌長大闕二字竝之闕二字蹈闕二字之則不闕

師訓之范而踐四教人道所謂義方闕二字所謂言

忠信不師而自闕者也是闕雄雋協服莫不歸稱仕

下闕侯下闕于闕勃海王帝之冢弟不遵憲典君以

特選為郎中令彈枉闕慝匡弼闕二字以闕兄琅邪

相亡即日輕舉州察茂材闕除修令遷張掖屬國都

尉以病徵拜議郎闕遼東屬國都尉不闕拜趙相左

位三下闕左疚闕二字行闕議郎闕二字連徵不就

君之始仕為吏師仍綏京闕興惠訓下闕陟功西尉

渠搜荒服來王後遷於趙叙民種德威懷闕立闕清

闕二字 匡闕二字 直闕 俗惡容悅之密闕 承闕 靈以

闕二字 宜錫闕 福三壽佐朋旻窮不弔闕二字 疾年

五十有三以中平四闕 二月戊午碎其四月巳酉葬

梁木比墮閔嗣多孤下闕 所自律闕 棐勒闕二字 詒

聲伐於後昆其辭曰於穆我君邦家之闕 正已師義

求福不回闕 言以道遠闕 先幾闕二字 有疾百侯僉

咨舍德何取將闕 名闕 如何弗闕二字 六亡天方闕

靡闕 胃降闕 歿而名垂善闕 令終休烈孔闕 永闕二

字 風爰勒金石千載遺芳洪迨隸釋

衡墓與碑在今齊州歷城縣界中古平陵城傍余嘗

親至墓下觀此碑因摸得之墓前有石獸制作甚工

云金石

吳子蘭墓城南完備山舊志

隋

鈇珍墓

濟南行記王舍人莊道旁一石刻云隋開皇丙午十

二月鈇珍墓誌巴郡武昌人學通三家優游田里以

壽卒遺山集

唐恭墓在龍山東南

近土人掘地得一碑旋掩之畧云大隋齊州刺史唐

公諱恭之墓又云公嘗三刺齊州精琴理多惠政葬之地曰襄城之南葬之歲開皇二年也

宋

張揆墓在城南據藥城集

蘇軾張文裕挽詞高才本出朝廷右能事方推德業餘每見便聞曹植句至今傳寶魏華書濟南名士新凋喪劍外生祠已潔除欲寄西風兩行淚依然喬木

鄭公廬蘇文忠公集

蘇轍張文裕侍郎挽詞持節西南二十年華堂遺像已蒼然歸來侍從三朝舊老去雍容平地仙落筆縱

橫題壁處誦詩清壯舉杯前東遊邂逅迎歸旄淚落

城南下馬阡藥城集

范純仁張揆龍圖挽詞三首宣力三朝舊於身五福全家風良將後經術古人前丁令終辭世留侯定得仙貽謀有賢嗣素業盡能傳范忠宣集

江邊承訃日羈宦正摧頽早獲登龍便慙無附驥才寄詩招悸魄引水活枯腮白首知難報長言致一哀二紀金華侍從臣昇平看足作閒人身躋顯仕由稽

古世有陰功為庇民但見朝廷方貴老那知河嶽遽收神哀榮終始公無憾况有清名服搢紳同上

魏花墓城西魏花莊舊志

關勝墓在城南渴馬崖西音齊

王象春關勝墓詩關公熱血灑西原虜馬長驅入郡

門安得重鞭劉豫骨一文同祭鄂王魂音齊

按關勝為劉豫守將豫殺之而降金見於宋金二

史劉豫傳則勝之墓宜在縣境而王季木謂其善

用大刀不知何據考周公謹癸辛雜識續集載龔

聖與宋江三十六人贊內有大刀關勝其或因此

而傳會耶齊音又云金人縛勝於西郊百計說之

不降且自啖其睛示不為用皆不知其言之所從

來也若岳通志謂勝與魏花皆守濟南劉豫殺之

按花從狄武襄南征安得復及見劉豫哉又不待

辨而知其妄矣

元

張榮墓城東張陵坵學士張起巖碑銘舊志

段直墓城東何二莊同上

郭太師墓城東老僧口有元太師郭公墓碑同上

張仁墓在唐王道口據碑

李吉張仁神道碑銘國朝馬上得天下以神武定四

方非武臣猛士莫能守也於是搜選豪傑登庸俊彥

加之以寵澤優之以世祿以致異人並出奮志勉力
誓死自效所以得其人者如公者亦由是而起也
公諱仁姓張氏其先祖棗強人也有高祖挈家屬遷
居濟南歷城之東唐家道口遂占歷城籍焉父諱萬
嘗為濟南王相公帥府提控軍民配扈氏二子長曰
仁次曰義公其長也配吳氏頓氏劉氏子四人長曰
信次曰佺次曰進次曰巨源三女公為人慷慨資稟
剛烈善騎射志膽堅決輩流中少見比張侯聞之內
申年擢為五軍都鎮撫兼總領歷城縣軍民事後由
征江淮根逐大元帥察罕官人攻擊安豐久而不下

公於本部選驍銳者四十人乘昏晦至城下公首先
登城奮戈大呼其餘軍衆相繼而越雉堞城中大潰
殺死不知其數遂克城焉大元帥察罕見其勇銳以
拔突呼之仍加賞焉乃賜銀盃其上鐫寫金字曰察
罕那顏賜濟南張拔突去金帳子裏要飶喫休當者
又以副帥納忽復親手賜白銀二錠以獎其功公曰
克安豐者非吾之力乃衆人之力也遂將白銀散諸
士卒及安豐平定還家濟南張侯知其驍勇復授公
總領歷城縣軍民事食采四戶公以春秋高大恐事
有關復白張侯以長男信以嗣其任張侯許之辛酉

年授信連海把軍事百夫之長至甲子年根逐先帝
攻取鄂州遇大炮中其右股而還家遂命張佺代馬
佺復授百夫之長守把邳州未幾經山東之亂還家
厥後中統三年春命弟進根逐張都督相公巡防益
都破長峪道攻謝水棚秋山東平止至元元年萬戶
孟公駐馬沂郊舉進授以沂郊萬戶府副千人之長
兼管四城兵馬事就領本軍炮手因病還家謂弟巨
源曰予職汝可任之曰尊父昆弟五人四皆享賜弟
不仕為志願樂孔聖之道遂舉房兄張儀以代其職
公弟諱義嘗攝歷城縣事兼防屬千戶配秦氏子三

人長曰儀次曰珪次曰瓊儀即義之長子也復授百
夫長以才勇聞帥府薦奉勅命以百夫之長加授進
義副尉壽年七十請老於帥府以其子守忠嗣任帥
府聞諸朝勅命守忠繼焉復授百夫之長噫公之為
人從軍行伍出征入守攻城破敵矢石不避人莫之
比是以慶流後裔賞延於世子子孫孫皆得享其爵
食其祿綿綿不絕皆公之功德所致也于是子信等
念先人之行實無所顯明日月漸遠恐其湮沒與其
弟姪輩持行狀叩首再謝請曰願子為文於石庶幾
不朽以照後世吉辭不得已故論次之而為之銘曰

偉哉張公性質非常有綱有紀為國忠良其雄赳赳其貌堂堂孔武有力百夫之防昔在軍中拓土開疆縱橫淮楚夫誰敢當安豐之勢如虎如狼功效莫比以獲寵光威聲烈烈英氣洋洋如山之高如日之彰休風不泯盛德載揚父承子繼天道永昌樹之豐碑以刻銘章萬古千秋德音不忘

張儀墓在唐王道口

碑據

劉敏中張儀神道碑銘國家以神武平海內恤武臣之勞故其寵數尤渥由百夫長而上其人或請老或歿其子若孫皆得襲其爵如古之世祿然慶賚不論

也故人人益奮勵矢死自効由是武臣得人為尤多如公者亦其選也公諱儀姓張氏其先冀之棗強人自七世祖遷於濟南歷城之唐口鄉遂為歷城人焉由始遷之祖迄於高曾世業農以譜亡名諱不可考祖諱萬配扈氏二子曰仁曰義仁事濟南張侯領帳下事從征淮南大帥察罕愛其勇銳賜之銀盃以拔突目之義公之父也嘗攝歷城事為防屬千戶以卒配秦氏子三人公其長也次珪次瓊公自弱冠以父廢為百夫長嘗遣戍沂郟至元十年天戈南向指以帥府命城正陽壘壘截然先期而城尋以六安當南

北之交要害所繫選公戍焉江南且平詔賜馬千餘匹置驛安慶以通江淮時公以兵守烏金驛宋故將有以餘黨構亂遮其所賜馬盡驅以去公帥所部追於驛南以死戰大殪其衆生擒數十人復其馬一無失者送馬至大竹園復遇寇戰走之卒致馬而還厥後嘗以推擇移戍於正陽於安慶於壽春於泗於滁所至推姦折逆以才勇聞二十六年始用帥府薦奉勅旨以百夫長加授進義副尉元貞元年春三月七日壽年七十以疾終於軍其子守忠奉其喪歸葬於唐口鄉之先塋禮也夫人吳氏淑婉備婦道子五人

長曰守約次守敬次守良次守忠次適興孫男女共七人公為人質直尚氣節勇往不顧雖甚勞終不以言人以此難之凡出入兵間嘗以守忠自隨俾之閱武事習戰陣而守忠亦自倜儻不凡故尤愛焉且老謂守忠曰吾自結髮從事行陣誓以一死圖尺寸之效以報國恩然止此耳汝可代吾事汝無愛而身以成吾志也遂請老於帥府以守忠嗣任帥府聞諸朝許之勅命且下而公逝是年冬守忠暨其兄守約輩持善狀泣涕再拜請曰今守忠當就職念先人行實無所顯明願得吾子文諸石庶托不朽敏中不可辭

為論次之而系之以銘銘曰猗歟張公惟百夫之長
 而有萬夫之雄確乎報國之忠而有能軍之容蹇蹇
 匪躬不矜其功雖名位弗及而聲烈已隆子孫蟄蟄
 七十而終賢子嗣之豈天報之未豐有元其中有崇
 其封既宅既寧繫祖考是從勒諸銘章尚可以慰其
 幽衷

秦津墓龍山西北津元東平防禦使

舊志

按墓有秦氏先塋碑銘宋貞撰即津所立載津事
 甚詳附載於此

宋貞秦氏先塋碑甲寅年夏四月德州防禦使秦君

狀其世次扣門謂予言不肖不天生七歲而孤鞠於
 兄嫂僅能勝甲便在行伍間淪落異土行三十年每
 引領東望未嘗不撫膺流涕也頃賴上世餘澤承乏
 近郡期以今年八月初二日歸葬二親於歷城縣龍
 山鎮西北原先塋之次竊歎世祖而下列為一圖
 刻諸先君墓左庶以為子孫之傳文以託遠敢百拜
 為請謹按秦氏世為濟南歷城縣人唐左武衛大將
 軍胡國公叔寶之後也經五代喪亂譜系無可考高
 祖諱崇曾祖諱昌皆謹身農桑以致溫厚祖諱德父
 諱寶能推其羨餘以佐不給當代故老猶能言之祖

母于氏母楊氏克守婦道內範甚懿君諱津天姿瓌岸自幼有膽力年十六七見天下方亂刻意騎射閭里年少爭從游貞祐中金主遷汴梁河朔不守從行尚書省張公興略定濟南授歷城縣軍民提控頗見親厚丁亥手下親隨私作過犯干許相連率摩下軍走東平東平行尚書省嚴公素知君名署歷城縣令兼本軍提控隸兵馬總管趙侯完壁帳下其冬十一月從侯取彰德進攻太行山之李合寨不日而下其功為諸校先壬辰春正月以行尚書省命提步卒千人渡河攻蓋岡捷之別招老幼萬餘人牛羊馬萬數

還駐曹州其城在魯汴之交兵纏者二十年但瓦礫

耳君躬督老幼稍構廬舍若將久

闕

者公過而見之

曰可守也即以君領州事是歲冬十二月金主自統

兵出由間道取衛州濟自黃陵岡同知蘇山潛納金

兵以叛且謀殺君遇夜得脫求救於東平得精兵千

餘生擒其副使李進等一十七人復保曹州金兵不

能至衛回走歸德國兵追之

闕三字

以反覆為名大

肆殺掠君訴之主將主將大怒皆歸罪於君械繫而

去置諸大名獄中時行省公方北上具言於

闕二字

遽

命遣使出之君既得釋乃詣闕訟其事竟抵主將之

罪因正授曹州長官在治十六年遷德州防禦使居
 二年復還曹州刺史兼勸官歲餘又改德州前後
 典郡凡二十年提兵凡數千里其戰功治跡不克具
 載特叙其所以起家者蓋如此娶夫人董氏有男四
 人長曰世勻次曰世傑次曰世英次曰世顯噫昔于
 公高大其門閭令容駟馬車過王祐庭植三槐自謂
 必生三公後皆如其言若合券天之報施善人蓋亦
 明矣秦氏以名將之後蓄德不施以貽於君而君又
 以特達之才克昌厥家不失舊物存者得以華其生
 亡者得以安其歸一門寵耀照映闕三字可以為榮

矣推原其自其偶然也哉是宜為銘銘曰維秦之先
 有功於周仲有車馬始列諸侯末大必折散不可收
 堂堂胡公躍出東周一劍橫行千里不留維君是似
 罔墜箕裘孔武有力克壯厥猷允矣貂蟬生自兜鍪
 兵衛森森旌旄悠悠錦衣歸來光照松楸何以致之
 有遠其流刻銘琬琰傳信千秋據碑
 段徽墓

張泰亨段公神道碑惟人稟天地英靈之氣以生其
 才闕有闕用而已然而非待其時待其地而欲展盡
 底蘊獨立功名於當世者亦難矣哉若夫版築飯牛

躬耕屠釣之士一旦蒙人之知被人之用離蔬釋蹠而享膏粱剖符錫壤而受爵位功光祖宗澤流後裔者古人誠有之今段公其殆庶幾乎公諱徽字君美其先景州阜城人也遠祖避後周顯德年間河溢之患舉族遷於濟南章邱縣嶮山之西因家焉大父諱欽以力農為業父諱楫字巨川嘗為濟南錄事功曹母王氏公年十五亡其母年十八父亦卒公雖孤卓然有自立之志幼閑刀筆書數精通吏事性廉潔謹愿鄉人皆愛之甫冠推為歷城縣掾史年未三十值金季貞祐初山東州縣悉為塞北之馬蹂踐殆盡

而濟南亦陷公時逃難於南山山谷間而僅獲免繼而燕城失守南狩汴梁復遣侯公闕守東平將安撫餘黎收復河北公亦被驅策是時盜賊充斥闕在嘯聚公憫良民被害者眾乃以方略誘致渠魁效順而民得稍安侯公以勞績遷公忠勇校尉充濟南章邱縣主簿秩滿赴河南調再闕開州濮陽縣丞未幾天下復擾屬天朝開剏河北悉臣屬之有濟南大行臺清河公素與公相善知闕之才乃辟為

有功乃授廣威將軍

公

嘗從 行臺公 招 土近數千餘里得大小州城

十有餘處居民數十萬口皆公贊畫之力後至庚寅
年行臺公北覲戎輅公亦從行先是有濟南鄰境一
將與公有 亂時嘗為衆 我濟水之田為清

河公奪其田而攻擊之從力不能支心嘗憾之至是
將訟於上前清河公亦欲與之直公因言於行臺公

秋以 結好息民

令吾民瘡痍皆蘇

之恐近心弗安訟何時已莫若姑恕之以紓民憂徐
為後圖公許之訟乃寢既歸遂列其 民以與

之至今彼猶德之

後行臺公南伐公以父葬事未

畢弗克就行既而有檄召公甚速公亟往之路見有

軍士逃歸者公皆撫諭使還及見行臺公行臺公曰

吾奉命出征軍人往往路次竄歸為之奈何公曰人

情誰不欲安緣連年行師略無暇民不勝其困加之

歲饑衣食弗能自給以

公出

物以賞賚之

庶可安 行臺公然之乃悉出隨軍所有絹例加錫

予軍士乃安逃者聞之徃徃復還及壬辰河南平師

旋逮丙申年遂自

移治於濟南

公以為亂

甫定之後人心稔惡弗悛於是一新

號令使民

知所畏復繕脩城池官署倉廩府庫無不完備而乃

幹桑麻魚鹽之利以厚民財積為

餽糧之用以

備歲計而又均戶之 廬而科稅賦驗丁之多寡以
給徭役不數年民皆安堵如故事行臺清河氏三世
前後凡三十餘年夙夜奉公始終如一深得為政之
體故濟南一境比他州號為最治每上計偕考課稱
為第一公以年老告退 許閒時年七十二歲丙辰
年六月三日以病卒於家官給賻贈 儀畢具越是
年六月五日葬於嶮山祖塋之次禮也公娶時氏生
五男長曰祺次曰禔襲爵授歷城縣丞次曰禧未仕
次曰裕早世次曰禎未仕五女長適賀氏早卒次適
行臺公次子邳州行軍萬戶張邦直次適分治

縣令新城張晉次適鄒平縣張尉男 次幼未適初

公一日嘗會諸親而謂曰兵革後吾族俱安加以我
自寒素中起身久居要職三十餘年子孫昌盛生計

溫皆我祖宗陰德之所致今枝葉分散別立塋兆

者已久處矣恐後世歲久亂其枝派有廢祖先之祭

祀今列序遠近尊卑宗枝畫為圖牒勒石 立於塋

次凡我子孫當思遺訓春秋祭祀奉之無忽公風姿

魁偉鬚髯秀整見之者莫不儼然 性本寬溫長者

無文吏刻薄之風至於待物接人怡顏順色溫溫如

也故其治民大率止貴清淨不擾而已是以隣境之

政多矜式而倣倣焉及死之日無遠近聞者莫不歆
 歔流涕其感人之深也如此蓋段氏世系出於春秋
 時魏大夫段干木之裔源流蔓衍散布天下自秦漢
 晉魏隋唐以降迄於今其間名賢偉士如段之為
 良將段秀實之為忠臣代不乏人難以概舉故略表
 而出之以示後來云爾是當系之以銘銘曰猗歟段
 公玉潔金貞一時遷跡為齊鈞衡帷幄深謨干戈奇
 績用贊厥成皆公之力外 軍士內 邦民而勞而
 治皆公之仁疏為祥風霈為膏雨民賴以生式歌且
 舞 茂德元功富貴壽考天令其終嶮山未

平遺澤未泯千秋萬年子孫其繼之

據碑

張宓墓在張林坵

據碑

李國鳳張宓神道碑大元有名臣故山東宣慰使贈
 江浙行省叅政封濟南郡公張公卒於至正四年四
 月八日享壽六十有六越八年當至正十二年其子
 元輔以神道之石未示顯刻持公行狀墓誌諡議頓
 首求文於國鳳鳳生也後嘗與先兄御史君拜公於
 府第竊聽其言論覲其丰采不敢以蕪陋辭噫惟公
 任保定總管之時抑軍撫民之事最為特異可稱道
 者於天歷初明宗皇帝在北服京師空虛西軍猝至

紫荆關戍禦之卒不支而潰百十為羣入保定界肆
剽劫邑居之民衆聚為城守計得潰卒無良者因槌
斃之時知樞密院事也先尼帥大軍違城五里而駐
紿府同知及縣尉與居民百餘人至軍責以擅殺盡
戮之血淋漓被道復下令屠城民詢詢思不靖公時
以病在告即舁疾冒白刃突至帳下也先尼怒愈張
蹠公於前詬曰女欲反乎公從容曰孰敢反耶我病
不與知府事已久且軍士不能拒敵而潰逞虐良民
此在法所不赦民初不辨誰何倉卒誤格之至死樞
密已刑百餘人償其死復欲屠城城中戶不下萬餘

萬一激生他變咎復誰任我寧以身代民死樞密其
勿恐民公辭直氣和也先尼默然為少沮然猶殺張
蔡國公五子解圍而去命公諭民以不殺故民間公
來歡聲如雷手額以更生相賀烏虜當是時西北尚
未寧謐保定在畿甸間使無知之氓懼禍一呼則安
危未可知也公以一言以定其幾非忠赤之至其能
然乎此不徒為生民計蓋為國家天下計也公既不
自伐其能世亦未有能盡知者此乃公之竒功可不
特書而著之乎謹按公諱宓字淵仲濟南人曾大父
諱衍以急人之難稱鄉里妣梁氏大父諱榮故金紫

光祿大夫山東行尚書省兼兵部都元帥知濟南府事進封濟南公致仕贈推忠宣力正義佐命功臣太師開府儀同三司上柱國追封濟南王諡忠襄妣宋氏追封濟南王夫人沈氏齊國夫人父諱邦憲故中順大夫淮安路總管贈宣忠秉義功臣中奉大夫河南江南河北等處行中書省參知政事護軍追封濟南郡公諡貞毅妣馬氏王氏俱封濟南郡夫人兩世勲烈載在國史具於家乘公幼以質子入侍武皇潛邸賜名蒙古台上正位宸極即授公尚沐奉御嘗燕見便殿有旨陳古聖人可法者公進曰臣家濟南帝

舜廟在焉舜聖人也因陳舜豫親數事且曰帝王之德莫大於孝上嘉納近臣識之後山東以蝗旱聞遂命公走舜廟致禱訖事而雨蝗則盡死還奏稱旨錫金織衣一襲由是有大用意仁宗即位詔授公二品官公謙終辭一歲中詔諭省臣者四詔語有曰朕惟張霸都兒昔以五十萬衆歸我太祖世祖念其勲勞爵以上公朕及親覩其孫蒙古台事先帝久欲職以二品辭不肯受其以三品授之尋選知滕州及陞辭上曰卿猶未官耶公拜謝臣已得郡願自效遂賜海東青鷹以寵之滕有昆弟訟財者公開諭以天倫之

重民友睦如初杖豪強柄持官府為治梗者闔境肅然麥一莖秀至三四穗州人歌之治遂最諸郡入為度支監丞出知南陽府未行轉兵馬司都指揮使預討帖實赤斤帖木兒逆黨遷彰德路總管蠲民代輸逃戶三百七十戶之徵科罷民陸運水和灰之費境中舊患多盜公令村各置鼓盜發則擊鄰村相應亦擊盜驚駭無所於匿皆遁去擢山北廉訪副使改保定除逃民之賦如彰德加倍之三免屠城之禍民尤德之至今調正定移平江平江俗健訟積訟牒七百餘既下車剖析畧盡人皆伏其能徽政之屬財賦司

構大家佃其田而州縣一切不得有所繇役皆細民大為東南弊公詣浙省請罷之省臣以聞詔罷平江杭州集慶提舉司眾賴少蘇今天子即位之二年召為吏部尚書明年拜嶺北行省叅知政事皆善於其職未幾以病歸至正三年起為山東東西道宣慰使山東食鹽為民害公請復行鹽法以便民益都路增油稅至四千五百定羨十倍經數下令立為禁止三路十三州民訟久不決者公督攝之六閱月分命有司決絕三千一百八十四事未及引年乞致仕歸濟南於四年四月八日丙寅遘疾卒於正寢以五月八

日丙申葬於歷城東和山先塋公配蒙古邁禮吉正氏濟南路達魯花赤曲列爾之孫監十路總管濶濶台之女婦德母儀可為世範再受封至濟南郡夫人先公五年卒始合祔焉子一人即元輔也才幹嗣其家廕授忠顯校尉奉天元路務提領今選松江財賦司副提舉先娶蒙古氏彰德頑閭中丞之孫女也速倫氏早逝再娶劉氏乃安定故家劉侯知州仲謙之女性本孝慈善事上下孫男一曰樞孫女二公葬之三年制贈中奉大夫江浙等處行中書省叅知政事護軍追封濟南郡公諡宣懿公性篤於孝弟與人

交皆有終始尤喜待賓客而自奉甚儉素平居夷坦宏博不為崖異至其為政則廉肅明敏吏不能欺其所設施必先興學課農為教養之本然後支分目比而治其餘故一守劇州四典重郡聲名常出其上兩暘菑沴無禱不應蓋其至誠之所致及去官民皆刻石以寄其思烏虜可謂豈弟君子矣鳳既最公行事有關國體之大者為之序仍繫以銘銘曰桓桓忠襄勲冠社稷帝酬其庸王此大國允矣貞毅踐履特特篤生宣懿實為蓋臣幼侍帷幄嘉譽日聞皇曰休哉秩以崇品公遜弗堪持已愈凜出知滕州布政優優

愛洽惠周瑞生東牟迺丞度支迺使兵馬節費宣威
 聲震輦下相臺我我瘳民之瘥易水瀾瀾救民於死
 平江之政治劇若閒撫摩愛養不專於寬吏戢其姦
 民樂以安入宰天官守法惟允銓度才否如尺丈引
 參政北省宣慰東藩恢我王度綏靖元元未及懸車
 遂致其仕榮歸故鄉奄云不起訃聞怛悼靡間迺遐
 帝眷不渝褒贈有加始終存歿其德如一寵賁恩榮
 世莫與匹歷城之東和山崔崔勒詞貞珉昭示後來

張養浩墓城西北一十里雲莊

陸通志

始公嘗謂吾居雲莊而樂且密邇吾先世大墓善死

必以昭穆序葬而於是乎祠焉九月丙辰公嗣子今
 秘書郎引導治命奉柩以葬而以清河郡夫人郭氏

祔

黃潛張公祠記

章邱縣東南十五里有養浩墓今按元史養浩其先
 章邱人後徙濟南今府城之西十里雲莊即其所居
 生既家於濟南隱於雲莊則其墓在此無疑矣有學
 士張起巖神道碑

陸通志

按養浩有自撰先塋碑在章邱東南相公莊張萬
 墓旁詳其文義及立碑年月萬乃養浩伯祖葬章
 邱自養浩之祖已居葬於歷城矣故曰密邇吾先

世大墓也此碑乃養浩所撰歷城一支之墓碑明
正德中其裔孫某摹刻立於章邱者後人不察遂
謂養浩墓亦在章邱誤矣

陳鳳梧張文忠公墓詩流泉千古說雲莊一束生芻
拜墓旁雲錦池邊春意動雪香林外午陰涼衣冠遺
澤孫曾在俎豆名祠歲月長仰止綽然亭畔路文章

事業正流芳

雲莊樂府附錄

馬丹陽墓城東六十里大水坑

舊志

趙受益墓

趙孟頫趙君謙甫墓碣趙君諱受益字謙甫相諱友

妣鄭氏考諱成妣郭氏由祖以上世居青州西流河
之南蔡家里金末貞祐中考逃難來濟南卒葬歷城
西南龜山之下十里河之原故遂為郡人焉君自弱
冠習文法書數任事不避繁劇當官者以為能吏省
部八舉居會計之職未嘗不課最性慷慨倜儻不事
羈束初吳人黃清卿在俘囚中君憐其才傾囊贖之
以歸使子姪輩從學待以師禮黃一旦有南歸之思
君厚贖之且令送達其家爾後游宦江左數年視他
人所好子女玉帛棄若涕唾唯收書數千卷而已觀
斯二者可以知其為人至元癸巳四月二十六日以

疾卒於家享年五十有九娶宋氏濟南名族是歲七月十九日亦卒享年五十有七子二人伯曰元禎仲曰元溥孫男二人曰芝曰蘭元禎等以某年某月某日合葬君夫人於十里河之先塋禮也既葬元禎等介道士張君來謁余文將刻石墓左以傳不朽予聞張君言元禎勤讀書元溥為吏廉謹鄉黨皆以為善人又嘉其勤勤懇懇有不死其先君之意風俗之衰久矣二子乃能如是子何可固辭也哉嗚呼高官尊位未必皆賢卑位小官未必皆不肖若趙君者亦可謂非碌碌之士其不至於貴達則命也後之覽者以

子言為信雖數千百載當勿毀焉

松雪集

明

濟寧王墓在門牙莊

舊志

歷城王墓在紫荊山

高唐王墓在雁翅山

寧海王墓在標山下

堂邑王墓在標山下

利津王墓在紫荊山下

安陵王墓在路家莊

紀城王墓在泉瀘莊

清平王墓在紫荆山下

永平王墓在紫荆山旁

秦琰墓在四里山下

以上俱見舊志

衛青墓在縣西北五里藥山西麓

岳通志

李賢神道碑銘余嘗觀夫太宗皇帝靖難之初豪傑之士一時雲集已而獲授封爵者不數十人然有同於効勞而封爵不及於生前者必於子孫發之若衛公是已公諱青字明德姓衛氏松江華亭人胸襟倜儻有氣概尤善騎射洪武中代父炳為隊伍長十有五年以勞封薊州衛百戶從太宗皇帝靖內難以謀

勇見稱初獻計曰大名薊州諸郡地險兵強必先克之以弭後患今我軍尚少須藉民兵以壯軍威然後大事可成也上嘉納之有白金彩緞之賜尋鏖戰正定陞副千戶轉戰鄭村琪陞指揮僉事再戰白溝河陞指揮同知復於東昌當先對敵被傷還守薊州遼軍忽至圍城不退公曰彼眾我寡實難持久乃出奇兵破之被傷上聞之遣醫往視賜米鈔彩緞又率騎士往哨濟寧生擒裨將一人至谷亭又擒謀者數人遂克東河陞指揮使又於淮河肥河小河齊眉山連戰皆捷進克泗州扈驛度江克金川門特授世襲指

揮使永樂初論功行賞陞中都晉守司都指揮僉事
有白金錦綺寶鏤之賚復調山西都司特晉宿衛六
年命往河南陽武督運神木於北京遂掌宿衛兵八
年隨駕口征拜輕車將軍專督糧餉師還受賞九年
命鎮山東特授保身勅賚予甚厚十年委督官軍開
通河道自衛輝直抵張家灣以便糧木之運十一年
率沿海軍士以勦倭寇十三年召至京師委管神機
營十四年復勅公率兵往勦倭寇擒獲久逃軍民傳
良等於曹縣條奏原宥者八千餘人十八年即墨高
密安邱諸邑妖賊勢甚猖獗公曰此烏合之衆宜急

擊之即率兵兼程而進至安邱遇賊公麾前鋒掩擊
而以大軍承之賊遂奔竄擒其倡亂者送至京師上
大悅以璽書勞之曰爾能運謀設策奮忠賈勇殄滅
妖賊惟民是保雖古之名將復何加焉今特陞爾為
山東都司都指揮使所領官軍陞賞有差宣德中委
任益隆特領將印勅公相機所在官軍悉聽節制今
上即位嘉念舊人晉陞左軍都督府都督僉事賜白
金彩緞公愈感激盡心凡有益於國家利於軍民者
知無不為在鎮二十餘年一方賴以為安正統初登
萊旱蝗公憂形於色率官屬齋戒朝夕祈禱因而櫻

疾乃上疏以受國厚恩未能報稱為恨上聞之急遣醫往視未至二日而卒訃至上甚憐惜輟視朝一日以賻儀秘器官為營墳凡殮葬卒哭祥日俱遣官諭祭諸王百官亦各致祭公生於洪武丙辰十二月一日卒於正統丙辰六月三日享年六十有一為人天姿開爽樂行善事喜讀書手不釋卷雖武弁起家不失韋布之行性至孝事母太夫人李氏左右就養不違居喪哀毀骨立友愛兄弟敦睦親族治家有法嚴於教子尤好施予周人之急惟恐不及死之日軍民無不流涕至有圖形立祠以祀之者卜葬於濟南歷

城鵲華鄉之原夫人周氏慈順恭儉事姑盡孝相夫有禮督率諸子葬太夫人於松江鄉人賢之及居公喪哀傷成疾又十越月而卒與公合葬焉公之曾祖諱福祖諱貴者樂善好義隱居不仕父諱炳元末從戎初累立戰功今以孫顯貴推恩追封三代貴炳及公俱贈特進榮祿大夫左軍都督府左都督追封宣城伯妣皆伯夫人公配沈氏繼李氏俱為伯夫人子男十一人曰頤曰穎曰顛曰預曰顥曰顏曰顯曰顛曰順順仕濟南指揮使早卒穎授奉天翊衛宣力武臣特進榮祿大夫柱國宣城伯今充總兵官鎮守甘

肅女九人都指揮董善百戶楊琮都指揮谷昺指揮
 鄭福許端都督張義男愷鎮撫國俊千戶王雄其婿
 也孫男十九人穎重念前人之烈受茲異數以春坊
 中允劉翔狀走書求予為神道碑銘予嘉衛氏一門
 之盛不多見也為之銘曰衛公挺生遭時方亨揚威
 奮武以建功名獻策即行受知不淺躬擐甲冑惟衝
 是殄累獲戰捷頻進官階敵愾之志牢不可排既受
 □□益效勤勞屢承重寄曾不少驕已而備倭東方
 仰賴撫安軍民遂臻康泰妖賊有作公往捕之亂首
 既得餘黨以披重書來嘉崇職復轉公之茂勳

愈顯晚膺求舊付託益隆府樞之佐復加於公及其
 令終特荷曠典子克世承大彰慶衍為善獲報影響
 是隨蘭玉之盛在理則宜我作銘焉以傳奕世歷千

萬年永永不替

碑據

鄧福墓大佛山下

鄧隆墓

韓青墓在馬鞍山前

許彬韓公墓碑天地有大經亘萬世而不泯者忠義
 之氣是也是氣在人歷坦途則為忠義之士遇患難
 則為死節之臣存亡雖不同所以為天地大經萬世

不泯者同忠義之所存而浩然之氣為之主也若鎮國將軍山東都指揮同知韓公青者其所謂抱負忠義而浩然之氣為之主者與公世家楚全椒上世以來代有顯者洪武中大父春從高皇渡江以功累陞副千戶既歿父貴襲陞正千戶守北平時文皇在潛即命公取懷來雄縣大戰鄭邳埧陞指揮僉事進指揮同知征大同白溝河陞指揮使再陞都指揮僉事攻奪九門進都指揮同知小河之戰死於敵公時在孩提叔友借襲指揮使尋以成立還其官公英勇過人且善騎射永樂中文皇征迤北聞公名特命率邏騎為先鋒公殺醜虜賊衆宵遁閱數日師駐天城陽和復命公率勅騎襲擊之賊望風奔命不暇宣德改元從宣廟征武定州既還賜賚有加明年甘延諸羌侵擾邊地命總戎征之舉公輔行公才識敏給能飭邊備嚴號令訓練簡閱有古良將風既還陞山東都指揮僉事公操持清慎門無私謁暇則與賢士大夫講論古今及將鑑武經諸書以資聞見嘗駐節臨清總督江淮漕運將士不勞而事克集以故再遷今官

正統十四年秋虜酋也先輩逆天道憑陵中國竊窺神器太上皇帝親御萬乘逆擊塞外為權姦所誤遂

至蒙塵賊乘勝長驅履險隘如坦途今上皇帝詔凡邊關可通萬馬者悉以重臣守之紫荆關尤甚衆推公往守而以副都御史孫祥為監軍公倉卒至關關寬長多歧路守者素不為備虜衆猝至乘虛而入尾尾不絕我軍至者才十之一衆寡不敵惶惑奔潰公揮旗招之得勁騎百餘諭以忠義當盡死報國衆聞之皆泣公縱騎獨出與賊交戰於升兒灣擊賊數輩已而賊悉衆迎公每手劔之數被創復為流矢所中公屹然不動自午達申轉戰益力賊圍之數重欲招公降公大罵曰臊羯狗奴我輩忠義而狗汝乎乃引

刀自刎實是年十月七日也賊退之三日收公屍身無完膚顏面如生聞者無不灑泣風紀近臣有交章言公戰死可憫乞加恩典者上命陞二級以其子承嗣幼弱命給廩優養於家配張氏及侯氏皆賢而有德子一人即承嗣女六人皆適名門卒之歲距所生之年得壽五十有二嗚呼公承先世之美能自奮力振揚威武以成厥功而中罹艱危以身殉國可謂見危授命殺身成仁者矣然則公雖死而名常存若張巡守睢陽余闕守安慶忠義之氣至今在人所謂天地大經萬世不泯者得不與此同一轍哉前此廣東

海寇猖獗擁衆臨城主將張安既失利而裨將都指揮王清力戰移日身被重創矢石如雨左右皆憚不敢近清身憊計窮為其所執賊素畏清既以甘言推為上將否則必誅清罵不絕聲又置之陷車不能死日令人誘之清終不聽惟求一死翌日將伏誅清曰汝輩繫我城下呼三司官臨視使知吾死所賊如其言至是遂遇害古人謂慷慨殺身易從容就死難立名若清者可謂無忝於公不愧於古名將矣彼有倒戈迎降開門輸款者有苟延殘喘以圖爵賞者視二公所處不亦顏厚乎公死之四年鎮守臯蘭都帥李

公之子文素與公厚恒憫承嗣幼弱公之忠義不白於世憤然於懷比以公務來京乃狀其行實詣余徵銘將過歷山葬公刻石墓道以彰公之潛德後之欲知公者當於此焉求之銘曰韓為華胄淮陰派分桓桓先世克著其勲公斯承之以宏先烈西征北伐有虔秉鉞漕運於京倉庾克盈匪徐匪棘人心實寧橈槍流芒掩映太陽公志勤王衆寡莫當一劍捐軀浩然之氣視死如歸公之忠義惟忠與義天地大經公能全之雖死猶生歷山之原理公之骨述行有碑過者拭目

李貴墓在捍石橋外

許彬李公神道碑銘天順五年正月二十一日鎮守
貴州副總兵右軍都督僉事李公以疾卒於官訃聞
上為之震悼輟視朝一日厚賻其家復為之諭祭詔
有司治喪自貴舁櫬還山東濟南之歷城葬焉國家
著令都督之葬法當樹碑神道其子勛介山東都帥
狄公廷器持按察僉事王先生所狀事行來乞銘按
狀公諱貴時顯其字也初姓苗其先本山後人入國
朝始占籍順天府之大興縣考諱贊任邳州衛千戶
妣于氏曾大父諱阿都赤元任國公大父諱青舊名

李羅帖木兒洪武二十三年隨乃兒卜花歸附始以
小校隸燕山左護衛改舍人左衛能自立功伐由總
旗歷陞正副千戶累陞指揮同知時洪武三十四年
六月也明年攻克東平汶上泲河大店小河齊眉山
靈璧泗州逾淮渡江克金川門屢以奇功陞本衛世
襲指揮使永樂八年隨征迤北殺敗胡寇陞山西都
指揮僉事未任十二年再征迤北得白金表裏之賜
又三年以疾卒庶長男黃頭甫三歲命食優給尋亦
卒宣德三年二月公以青之姪孫來自邳州命襲其
職是年九月前哨會州與賊交鋒以功得賜白金楮

幣命隸三千營寵異之也是年詔以都指揮子孫俱令注缺管事故公得注授山東平山衛指揮使正統三年選率馬兵官軍番直赴操京師管五軍之右哨九年隨昭遠伯迤北征進當先突入賊陣以奇功聞陞山東都指揮僉事仍操備右哨尋推選協贊總戎景泰五年二月辰貴之間苗蠻猖獗詔舉名將充副總兵往鎮其地公實授命以行時以公姓苗與苗相嫌故賜今姓六月平越黎從羊保麾下賊首阿挈僭稱王號煽惑苗衆流毒道路公率勁騎直搗賊巢賊勢平奏捷陞署都督僉事天順元年正月皇上復正大位差禮官秦顥賈勅賜以白金綵緞是年十月實授都督僉事二年六月勅與南和侯方瑛合兵征東苗公尅期而至攻克盜賽克柔江利翁受河盤龍夏戎琵琶楊安口種苗計一千二百餘寨菁洞生擒渠魁王刺冬等班師回鎮是歲賊首王阿榜復於翁金山硬寨烏合苗衆肆為劫掠四年正月再調兵平伐分進擺芒攻克翁受已巴令橋谷龍奇翁岡山菁翁金山硬寨悉平三月班師是年七月西堡狁獠蠻賊為患十一日進兵老虎關攻破師子孔伐乍山硬寨奏捷於朝時公以累歷戰陣勞瘁困憊乞歸養疴濟

奏捷於朝時公以累歷戰陣勞瘁困憊乞歸養疴濟

南上賜俞允未就道而卒實天順五年正月二十一日也距所生之年得壽五十有六葬之日乃卒之年八月十一日也娶許氏先卒繼劉氏俱封夫人側室劉氏馬氏子四人長勛娶何氏次勉次勤勸女四長適臨清衛指揮王綱次適膺襲陳富吳江劉金鳴乎公為人端重謹厚言動不妄為將知勇兼備帥師所過紀律嚴明秋毫無所犯而士卒歸心故所向成功而得褒嘉之命錫賚之榮者以此也嗚乎公祇事朝廷涉歷山川久用志篤故能建功國家流光史冊致身貴高以垂名不朽豈非古名將之流而今之不可

多見者與銘曰明聖之興有命自天必有輔翼名世之賢桓桓李公勇蓋萬夫疇克當之拉朽摧枯辰貴之間苗蠶僭偽公往平之殲厥醜類帝嘉公能股肱心膂吏治西除兵民安堵公於事上誠一不二知竭臣哉朝野並瘁公於馭衆有紀有綱撫如春和令如秋霜沒有榮恩賻贈祭奠公之真靈服茲寵眷歷山之原松柏蒼蒼勒石銘功永矢弗忘

以上俱據碑文

王允墓城西五里

舊志

尹旻墓在八里山陽

同上

李東陽尹公墓誌銘吏部尚書尹公既致仕十有八

年卒於家上聞訃嗟悼遣官諭祭勅有司治葬事仍
贈特進太保謚恭簡賜之誥命褒舊績也公姓尹氏
諱旻字同仁世為歷城宦族公七歲知讀書稍長下
筆數百言正統丁卯舉鄉貢第一連擢戊辰進士簡
入翰林為庶吉士己巳授刑科給事中景泰間值國
多事屢有建白皆傳正義天順丁丑遷左給事中英
廟見其儀觀魁偉音吐洪暢欲大用之尋擢通政司
右叅議轉左叅議己卯旱代祀海岱禮成而雨庚辰
持節封安南國王盡却餽遺國人斂服辛巳王師有
事於陝西公出總軍餉有白金綵幣之賜壬午丁母

寡癸未驛召至京師擢吏部右侍郎成化己丑遷左
侍郎歷王李姚崔四尚書皆曰代此位者必公也壬
辰漕河壅滯公往督官運事遂集癸巳勅拜尚書命
侍經筵戊戌加太子少保賜玉帶麒麟服己亥加太
子太保累進階至光祿大夫勲柱國甲辰加太子太
傅公久掌衡鑑博采公議不為私撓天下翕然稱之
有姦吏李孜省者貴幸用事憾公甚構成大獄再削
職以尚書歸公不自辨列惟引咎自責而已今上御
極孜省既伏法乃吐實於官諸黨惡者罷黜殆盡而
公壽考終命竟膺褒卹非獨復其故物而恩禮有加

焉然則世之以仇怨相傾擠竭計盡勢而不為後地者亦何益哉公素負學識善斷大事尤精鑒強記每經銓注雖稠人小吏閱數年猶識其名時料人壽天成敗歷歷多竒中故其退也大夫士屢疏薦欲起之而公亦老矣惜哉公生永樂壬寅五月二十八日卒以宏治癸亥九月十七日子龍己丑進士前翰林侍講先公十年卒孫繼祖以公恩廕中書舍人予與公居鄰每挹公風度聆其言論未嘗不嘆服焉比聞公喪慨者舊之不可復見而繼祖以遺命見疏奉狀請予銘是惡可辭銘曰赫赫英祖簡修進良燕翼厥謀

以詔憲皇翹翹尹公行譽言揚給舍獻替銀臺出納聲名焱馳意氣山拔亨衢在前靡適非達天曹我我公在任之端居廟堂進退百司絜短較長左右具宜會受敷施惟帝所用手操權衡與世輕重北馬羣顧南金品貢二十四年既久且專手所植樹其高蔽天棟梁楠檟百材萃焉盛名難居造物所忌城門魚殃崑岡玉碎少行老歸綽有餘地人才實難矧惟老成曰篤不忘天王聖明爵以酬勞諡亦稱情天之定矣人之勝矣君子有性不謂命矣九原有知公可瞑矣

懷麓堂集

按岳通志是墓李東陽撰碑以墓誌為碑訛舊志又載劉健神道碑文以與墓誌多同故不載

張宏誼過尹公墓詩蒼蒼松柏林杳靄含烟霧石羊卧衰草翁仲寂相顧吁嗟公生平謗言時可懼如何多正士弔挽留哀慕峴碑如林立一一字俱綠竊思君子澤自應綿世祚歸樵指山村苗裔數家住耕鑿食先德頗能驚霜露因思前代風標榜成黨錮所遇非所忻羣起相詆忤明德翳幽潛青史何曾注徘徊生感嘆不覺山光暮

素齋偶吟

史蘭墓在四里山西

舊志

劉欽墓在城西十里

陸通志

張鶴墓在城西南五里

按舊志在紫青山南在城西南五里者為祖墓也

王勅墓在縣西南十八里龍窩山之陰

邊貢墓在城東南萊家莊後

以上俱陸通志

李廷相資政大夫尚書邊公神道碑皇明有文學政事之君子曰邊公公諱貢字庭實別號華泉其先淮陰人也六世祖朝用元至正兵亂避地歷城華不注峯之陽因冒王姓故今為歷城人朝用生一誠高皇帝定天下始復邊姓一誠生文質以公大父貴贈奉

政大夫應天府治中文質生寧即治中公寧生節山
西代州知州皆以公貴累贈資政大夫南京戶部尚
書公生有異質即襁褓時祖母王夫人時置膝上口
授章句一過輒成誦既乃從大父治中公於官所於
是公角尚卅即蔚有文名宏治乙卯年方二十舉山
東鄉試第四人明年丙寅登進士第授太常博士時
敬皇帝重祠事公駿奔惟謹嘗以告不與上私語左
右曰何不見年少官人耶其為上簡注如此乙丑六
月擢兵科給事中公性峻直又練習國章通曉時務
抵掌談天下事雖重忤時貴弟畏避敬皇帝登遐公

劾太監張諭與太醫劉泰高廷和用藥之誤又劾太
監苗遠與保國公朱暉都御史史琳用兵之失詞義
剴切聞者凜然是年九月仍擢公太常寺丞既而逆
瑾擅權凌轢衣冠無所不至公又不能善事顯貴人
於是顯貴人伺瑾顏色出公為衛輝知府庚午改荆
州時藍鄙寇亟飛輓之務公以身任之民不擾而事
集克獲之功公與有勞若夫革吏姦察民隱修廢墜
宣恩惠為天下治行最卒未擢山西提學副使尋丁
父代州公憂甲戌服除起公河南公正已以格物先
行而後文申條教以定其趨勤考較以程其業復文

體以示其標嚴勸懲以鼓其氣由是士經公訓迪者莫不充然各有所得丙子鄉試號稱得人丁丑丁母董夫人憂初公體豐顏渥風神藻雅兩更三年喪哀毀踰禮自是積衰成疾而公亦倦於遊矣辛巳今上入繼大統詔求遺逸撫按諸公文章論薦乃即家起公為南京太常少卿嘉靖癸未晉南京太僕卿承平日久騎政漸廢公至末期釐弊課功公私稱善甲申改南京太常卿丁亥再改太常卿提督夷館時四夷文字體各地殊八館諸生學無師授公徵求故譯是正諸文以成一家之學以通遠人之情戊子以年勞

轉南京刑部右侍郎己丑擢南京戶部尚書東南財賦半輸留都百官六軍咸仰給焉制以都御史總之得相疑忌事多格闕公曰會計者部之事也覺察者院之事也何妨焉公之識大體事多類此辛卯忽以疾懇疏乞歸初公癖於求書所蓄不啻數萬卷壬辰偶遭回祿焚之幾盡公仰天大哭曰嗟乎甚於喪我也疾遂篤胡夫人謂公曰即不諱麗牲之石誰當銘公者既而曰宜莫如廷相公然之已而卒惟公與先太保公同省又同舉進士甚相愛也廷相叨官詞林兩佐南銓又辱公忘年之雅日夕以文事相劇切有

師資之益焉則茲役也其奚敢辭追憶國朝文章無慮三變高皇帝初正大統青田金華義烏諸君子力以斯文為己任剗削舊習橫制頽波幅尺騷雅興起學士永樂以後騷卿藻士布滿天下然辭頗纖弱稍異曩昔識者病焉敬皇帝時明興百三十餘年於茲矣四海梁肉百官委蛇得以肆力宏學留心藝苑於是公起歷下與北地李夢陽河南何景明互相師友力追古作妙悟正機鼓吹盛美可不謂振世雄豪也耶况公孝友天至又喜賓客樂道人善援引後進嘗若不及至於當官蒞法必盡其力所在人皆嚮之愛

之語曰文質彬彬然後君子其在斯乎其在斯乎公生於成化丙申八月卒於嘉靖壬辰二月年五十有七配柴氏累贈夫人先公卒繼配胡氏累封夫人子男二人長翼以廕為太學生次習皆幼所著詩文四十餘卷藏於家門人輩相與謀梓之蓋世所必傳者也葬以卒之年某月日其墓在邑城東原祖塋之側銘曰皇皇大明文治誕興言言歷城積高氣靈郁郁先生應運而升達治之本立士之經摘采元黃流聲宇宙人謂公才公不自有以器以年容臺是授周旋祀事受知我后乃擢黃門侃侃正言縉紳相賀風采

凜然再進容丞厥城是專督學梁豫教化攸宣惟帝
女嘉首下徵詔敷歷兩都薦掌邦教方期柄用允升
於道胡適其歸克遂高蹈我讀我書天胡災之斯文
之喪不其在茲公命近止吁其可悲門人達者愛慕
厥遺華峯之麓佳城鬱鬱奎壁之間文光上燭我銘
諸碑用昭世族公乎有知庶幾瞑目

舊志

田雯萊莊觀邊華泉墓碑詩溪風吹野棠亂落花如
雪惆悵青林間淺山埋片碣晚天淨無雲萬峯一明

月 古懽堂集

張元華不注道中懷邊華泉先生詩 華泉在華不注下先生墓直其

南數 歷下稱詩宿尚書沈杜儔敦盤分北地宗派啟

東州墓道風烟斷華泉蘆荻秋遺文傳海岱永賴砥

橫流 綠筠軒集

徐暹墓在榆山有薛樟墓表 據碑

劉天民墓在五里溝 舊志

陳明墓在城東南六里

黃臣墓在縣西奎山之陽

按臣濟陽人

范瑟墓在紫青山南

殷衡墓在城東小莊 以上俱舊志

江濬墓

李攀龍江君墓誌銘子如錦葬君於杏園祖兆東南五十步盖用君所自卜兆云

滄溟集

李攀龍墓在柳溝

舊志

攀龍亡妻徐恭人狀葬郡城西北馬鞍山之東陽祖

兆南若干步

滄溟集

王世懋東游記萬歷丁丑秋閏八月王子朝於京師歸竝故道返於閭井中間忽念故人李于鱗物化八載雞酒之酌弗躬失今不假傳一行病夫業且歸卧轅不北矣恐遂為終身悔乃自奮曰即病必往于鱗

家歷下而齊河去歷四十里而近業欲拜于鱗墓不可令兩臺使者知乃計為羸服間行而先一力聞之于鱗子駒報曰先人墓在長清道中毋煩間行也余益喜過望遂發齊河稍折而東幾迷失道會候者至云墓近矣請小憩民家以待駒駒至即與偕行墓所僅一尺土邱中耳無周垣封樹非得駒不能識也問之云將卜遷別葬耳佇立凄然具酒設拜焚所為文及詩雨泣而別日暍抵長清

查志隆岱史

施閏章李滄溟先生墓碑嗚呼有明三百年著作家衆矣獻吉仲默已還稱元美于鱗天下無異詞元美

虎視四海獨亟推歷下曰漢朝兩司馬吾代一攀龍
蓋欲然以身下之迄於今家有其書人耳其姓字傳
誦其流風遺韻不衰余視學濟南問其里因弔其墓
而子孫微甚無能言者詢得之鄉先生郝給練遂偕
藩使陳君兵憲陸君竝轡往墓在城西五里許皆下
馬拜蓋藥山之麓也不封不樹余低徊久之相顧嘆
息于鱗平生負才簡伉屏居鮑山當道冠蓋相屬至
屏輿從候門卧不起今未及百年荒草孤墳樵采莫
禁牛羊躑躅其上斯雍門所為哀吟孟嘗所為泣下
也況於泯滅無聞之人乎墓側有豐碑仆地無字陳

君顧余曰嘻久矣其待君也余謝不敏乃碑而表之
曰先生諱攀龍字于鱗號滄溟登嘉靖甲辰進士官
刑部出守順德論最擢關中學使者以不肯奉台檄
為文自免歸再起至河南按察使卒年五十七其政
蹟詳殷正甫誌銘王元美傳中不具論論其著者于
鱗生平非先秦兩漢書不讀非王吳殷許宗徐輩不
交驩其為詩環視諸公非盡出已下則不出考之詞
賦之科可謂嚶嚶道古進取之狂士也其詩七言近
體高華典麗有裁眉天半之目拔其尤者千人皆廢
樂府五言古摹漢魏古文詞摹左國先秦高自稱引

及元美所標榜頗失之太過要之非近代小家所能
措手夫文章之道有利有鈍小則霸王于鱗崛起
滄海雄長泗上諸姬主盟中夏燕秦吳楚之人翕
然宗之如黃河泰岱又如太原公子望之有王氣斯
固萬夫之雄也後之學者聞于鱗之風皆據碑高步
追踪古作者于鱗其有起衰之功矣余將求其子孫
新其白雪樓為于鱗別館而先之以其墓嗟乎于鱗
之文不待余言而定者也若其壙墓不治碑版無傳
則後起者之責也於是乎書順治十五年戊戌十月

立碑據

劉鎮重修李滄溟先生墓碑記前明中葉以名臣而
負名譽者濟南有二人焉一為華泉邊尚書一為滄
溟李先生也先生諱攀龍字于鱗登嘉靖甲辰進士
由曹郎歷郡守提學累官河南按察使以詩文名嘉
隆間為同時七子冠海內稱為滄溟先生既卒葬柳
溝先塋上為先生祖父稍右先生之子駒耐焉距今
蓋百餘年所矣而墓亦時圯順治間宣城施學使閏
章嘗修之今又五十餘年曩所脩者復壞蓋先生之
後人微矣過者知為先生四世衣冠所託而荒塚纍
纍漸就湮沒良可慨也嘗按有明享國凡二百七十

餘年德業事功名臣輩出而文章之道則前莫盛於
宏正後莫盛於嘉隆蓋此六七十年非獨時屬承平
風氣完厚凡詩若文率為運會之所轉移而不覺亦
有大力者起而措拄其間倡明作述而彼此交相應
和遂得獨鳴其盛於一時後即有挾私心創異論欲
力排而去之卒不能也蓋初之盛也有北地信陽一
洗洪永以來纖弱卑靡之陋而身贊其功者邊尚書
也後之盛也有太倉諸人一泯何李以後紛爭鑿柄
之嫌而倡為之首者則先生也先生與尚書州里既
同名譽相埒享年則俱不逾中壽有子則皆克紹家
聲而一再傳以後後起式微亦約畧相等豈名盛者
食報不豐而君子之澤亦有時而斬耶不然何生既
同方而後先之事又何適相符也唐時李翰林墓采
石杜負外墓耒陽其後一徙青山一徙偃師旅殯之
所既移矣而千百世以下過其地者方且為之憑弔
徘徊而不能去蓋其流風餘韻猶足以感人也惟韓
吏部亦有言李杜文章光燄萬文羣兒不自量而用
謗傷則亦蚍蜉之撼而已先生以詩文鳴當世亦若
唐之李杜而末世或有議之者則又何哉余既為先
生脩飭墓道而更著論之如此康熙五十五年歲次

丙申孟夏月吉旦立石

碑據

田雯柳溝拜李滄溟墓詩下馬拜滄溟荒山亂石橫

炎天無白雪遠樹有泉聲邊許才相映鵲華峯正晴

弇州今已矣誰重濟南生

古歡堂集

張篤慶藥山麓望滄溟先生墓詩公歸神兮山之阿

水蜿蜒兮山嵯峨陽春絕調發浩歌大雅潤被何其

多公安排訾彼則那竟陵之吠奈公何嘉隆正音琴

瑟和寂寂秋原埋玉珂我來憑弔當陂陀豐碑何處

迷寒莎嗚嗚山鬼吟女蘿未得挂劍深摩挲吁嗟乎

山有岱兮水有海滄溟遺響依然在我歌九辨一招

魂樓頭白雪流光彩

崑崙山房集

按于鱗自作徐恭人狀云葬於馬鞍山之東陽舊

志云攀龍墓在柳溝正馬鞍山下也殷正甫墓誌

乃云葬於牛山王敬美記又云在長清道中則與

狀及舊志皆不合敬美又云將卜遷別葬或者始

葬牛山後仍遷馬鞍山耶今馬鞍山墓前翁仲華

表與明制按察使品級相符而坊額但題李氏先

塋疑于鱗葬母時所立者于鱗葬此實無所據或

施愚山同郝焜訪聞得之誤以于鱗先人墓為其

墓耳然敬美所謂在長清道中無周垣封樹者竟

不可考惜哉

許邦才墓在火關舊志

玉華山行過許長史殿卿墓下詩亂峯高下東川路

一水浴回到墓門我倚夕陽呼長史鳥啼殘雪憶梁

園中原紫氣銷沉盡半碣春蕪姓氏昏可惜鵲山村

裏句無人托契與重論二十四泉草堂集

周繼墓在茂陵山舊志

趙世卿墓在荆山前

劉伯紹墓在免兒嶺

一見墳墓在武場東

陳九疇墓在六里山

劉勳墓在華山下

盧義墓在城西五里舖官廳側以上俱舊志

張鶴鳴義娥傳畧義娥名桂香義者觀風者奇其死

以意證之也蓋郡諸生吳愛眾養女云娥生流備比

歲凶鬻於愛眾甫十齡婉靜不嬉先是愛眾母盧有

侄三才家替無依依姑餬口愛眾乃直僕御之願指

畧忤輒展足賙言曰奴奴侵牟我餘奴胡為亦嘗加

榜掠一日愛眾與妻李對案哺食三才負米入愛眾

嫌之曰捐好銀錢為擇白粲米如此為尅正矣三才

遠掣腰間匕首數之曰併死可在今日刺之不中愛
 衆繞磨旋娥大叫以槌以槌槌縈磨索中愛衆素病
 瘵不能支三才以積憤竟砒然中飲刀飛血妻李累
 息奔踰西壞垣賊舍愛衆逐李愛衆尚強起護李撞
 壁僵掌血印壁痕殷數日李高隣媪門隣媪折曰
 我無讎君願君舍我賊舍之復向壁間斫愛衆死娥
 持賊裾大呼邏者曰奴殺人奴殺人賊斫其頭骨併
 腦血交淋淋下娥持裾如故賊惶急維曳至衢娥呼
 擒賊不休賊愈狠斷其指乃去娥竟死衢中大驚一
 市人邏者糾衆兵尾之至灤源里東將入門守城者

擊以艾遂擒之愛衆有襖女另女奴抱之亦甫八歲
 難從不能避履出戶下賊瞥未之見命也而李氏妻
 者已別嫁為他人新婦矣張鶴鳴曰娥異主持賊腦
 淋不合于深取其不憚天性勇也縋縈之智出之緩
 娥之勇出之急獨妻者忍忘壁掌血跡如新且親見
 娥之慷慨忽而面頰他室彼摩筭青陵夫非人女子
 哉見舊志

張季彥義娥墓詩我識吳生面忽聞吳生死其奈刺
 客坐中起萬夫膽慄神披靡吁嗟當日之義娥獨奮
 臂而前訶攬賊之衣袖冒賊之匕首賊能倉皇四顧

走十齡女三尺鐵龍泉怒吼白日昏蛾眉頸濺青鋒
血國士橋邊恨未申易水蕭蕭空入秦區區睚眦何
足數何如總角之女能報主小紀集

國朝

懷晉墓在鑛村東採訪

鍾性樸墓在華不注山南同上

安致遠詩自返潯陽江上船買山竟築濟南阡高人
在昔多僑寓才子從來如大年明鏡清流思謝傅林
風海水失成連帷紗幾許傳經士木及侯范負土賢

鍾憲副
公家傳

孫建宗墓在縣東北五十里岳通志

孫光祀墓在茂陵山東採訪

朱綱墓在祝店東

按綱宏祚子宏祚葬高唐岳通志乃云朱三錫墓
在縣東二十里子綱墓耐側誤

戴璠墓在雁翅山東

王革墓在四里山西北

陳有功墓在釣突泉西南二里壩北有自述行實刻於
神道碑陰

曾孝女墓在城東八里五鼎山北以上俱採訪

沈廷芳曾孝女哀辭畧孝女棺歸歷下桑毀甫山長
 為之傳予重其行乃為文以哀之其辭曰嗟歎孝女
 稟至性些少無陝輸克專靖些德茂此儔家相慶些
 遠隨之官阿彌病些密侍晨昏心恹恹些昊天不弔
 忽降大憂些中宵赤烏飛入懔懔些呼天莫聞身委
 鬱攸些血凝母體抱之入幽些嗟歎孝女誰則無死
 些似女之死古今有幾些若稽前聞儂三四指些曹
 抱父尸倒流江水些王抱母柩滅焰尺咫些王孝女遭焚抱
母棺號泣而火會也殉之焚身牀第些姚江柳江孝
息見南雷文定水瀟瀟些有祠巋然終古不圯些佇請彤廷旌宅里

些歷山並峙鬱新阡些石表峩峩拂雲天些觀風於

東欽淑媛些嗟歎孝女神孔安些隱拙齋集

歷城縣志卷第十七終

東姓

從山

歷城縣志卷第十八

古蹟考五

寺觀

浮屠老子之宮昌黎韓子所謂宜廬其居者也然遠者千餘年近亦數百年且其像設之莊嚴梵策之藏弃儒之居其宇而守其業者或弗逮焉昔程子見釋氏誦經曰三代威儀盡在是矣其殆有感而言之與故以殿古蹟之終焉

符秦

朗公寺隋名神通寺

朗居琨瑞山大起殿舍連樓壘閣

見水經注

竺僧朗以偽秦皇始元年於崑崙山中別立精舍創

築房室製窮山美內外屋宇數十餘區

釋慧皎高僧傳

仁壽三年正月復分布舍利五十三州至四月八日

同午時下其州如左 齊州野鹿來聽鶴翔塔上

集神

州塔寺三寶感通錄

西晉泰山金輿谷朗公寺者昔中原值亂永嘉失馭

有沙門釋僧朗者姓李冀人西遊東返與湛意兩僧

俱入東岳卜西北巖以為終焉之地常有雲蔭士俗

咸異其禎感聲振殊國端居卒業於是天下無立矣

雄負圖秦宋燕趙莫不致書崇敬割縣租稅以崇福

焉故有高麗相國胡國女國吳國崑崙北代七國所

送金銅像朗供事盡禮每陳祥瑞令居一堂門牖常

開焉鳥雀莫踐咸敬而異之其寺至今三百五十許

歲寺塔基構如其本焉隋改為神通道場今仍立寺

云同上

沙門竺僧朗晉太康中於東岳金輿谷起寺列眾苻

堅之末降斥道人惟朗一眾不在毀例燕主給以二

縣租調拜為東齊王魏主晉帝苻秦並致書遠錫至

今三百餘年寺像存焉現有僧住重其古迹名為神

通寺同上

仁壽置塔勅令法瓚送舍利於齊州泰山神通寺即南燕主慕容德為僧朗禪師之所立也燕主以三縣民調用給於朗並散營寺上下諸院十有餘所長廊延袤千有餘間三度廢教無敢撤欲有犯者朗輒現形以錫杖撻之病困垂死求悔先過還差如初井深五尺由來不減女人臨之即為枯竭燒香懺求還復如故寺立以來四百餘載佛像鮮榮色如新造衆禽不踐於今儼然古號為朗公寺以其感靈即目故天下宗焉開皇三年文帝以通徵屢感故曰神通也初

至寺內即放圓光乍赤乍白時沉時舉或如流星人衆同見井水涌溢酌而用之下後還復又感羣鹿自然至塔雖鼓吹衆鬧馴附無恐又感鷺一雙從四月三日終於八日恒來舉前立聽梵讚恰至埋訖迹絕不來斯之感致罕聞於古瓚具以聞

釋道宣續高僧傳

朗公谷今有朗公寺亦三齊名刹歷代有碑

齊乘

張天瑞神通寺記畧秦嶽之陰有寺曰神通其地隸濟南歷城之仙臺鄉於川為錦陽於谷曰黑風面山曰金輿橋梁曰通聖東一臺臺之上有浮圖為門四為方五西一臺臺之上有鐘鼓樓轉輪藏殿凡若干

楹相傳為古戒壇也又其東有山曰青龍崖下有池曰聖油曰聖麵山之南有浮圖一凡若干級其西曰虎山有石佛千龕傳聞亦謂為蕭梁時也噫嘻據一方之形勝而軒豁昂聳於羣山藪薄中蓋東齊寥寥一古刹也第以兵燹之餘雨瀑風摧幾為榛莽適居士韓福泰偕其徒莊福宣遊覽其地慨嘆者久之因各出其有一切殿宇悉撤而新之大殿二一以供佛及十八羅漢二十四諸天一以供五百阿羅天王殿四楹伽藍祖師二殿亦如之殿之後為方丈左為禪堂又其後為法堂兩廊翼列方丈之左右皆以筵賓

客居徒衆又其西北隅則有龍虎塔祖師林其東有四門塔龍鎮塔在焉肇工於成化丙午三月朔日落成於宏治己卯九月二十一日藏事介余為之記於是乎俾歸而刻之石以垂不朽云

採據碑

神通寺柏樹甚多中有一株上分九枝各枝皆合抱不能交垂陰數畝土人名之曰九頂柏在四門塔後

採訪

李攀龍神通寺詩相傳精舍朗公開千載金牛去不迴初地花間藏洞壑諸天樹杪出樓臺月高清楚西峯落霜盡疎鐘下界來豈謂投簪能避俗將因卧病

白雲隈

滄溟集

許邦才神通寺詩百里泰山陰千年號寶林諸天聞
說法初地問安心古殿松聲合長廊月色深夢醒禪

榻寂清磬下雲岑

舊志

元魏

大明寺

大明湖西即大明寺

水經注

魏明寺

歷城縣魏明寺有韓公碑

酉陽雜俎

高齊

光政寺

歷城縣光政寺有磬石形如半月膩光若滴扣之聲
及百里北齊時移於都內使人擊之其聲杳絕却令
歸本寺扣之磬如故士人語曰磬神聖戀光政

酉陽雜俎

隋

般若寺東佛峪內

舊志

按明成化間碑云寺創於隋文帝時今考石壁上
有開皇七年造佛像記則云創於隋者殆不誣也

湧泉菴

明段雄重脩記稽其所自乃於大隋開皇重脩

據碑

湧泉菴在柳埠東百尺飛流千章古木滄溟有詩

舊志

唐

興國寺

舊名千佛寺在千佛山上唐貞觀建石崖皆鐫佛像

成化四年重修

舊志

千佛寺亦名興國亦名遷祓隋開皇間鐫佛像於山

陰隨石作形

府志

邊貢遊千佛山寺詩二首亭午登山寺淹留夕未歸

涼風起高樹落葉滿僧衣城郭寒烟聚樓臺暮景微

京華十載客愁絕賞心違

雞鳴春日曉鐘落上方幽樹濕雲猶住山空翠欲流

酒牀隨客去詩草付僧收虛羨巖棲子塵鑣不可留

華泉集

陸欽詩岱雲烟霧鎖龍宮香閣岩堯翠巘重狂客偶

攜青玉杖高僧常住白雲峯瑤燈萬象懸虛照松磬

千巖起暮春蓮社風流吾所羨宦途禪榻未從容

少石集

劉勅詩數里城南寺松深曲徑幽片湖明落日孤嶂

插清流雲繞山僧室苔侵石佛頭洞中多法水為客

洗煩愁

舊志

回龍寺王舍店西相傳唐太宗征高麗時建

興龍寺王舍店東北隅相傳唐太宗建

黃桑院龍山東北一名兜率院貞觀四年建

法雲寺在隱士峪建自永徽初廢於萬歷末

慈氏寺在遙牆武后建嘉靖時重修

開元寺府城內建於唐

按開元寺明初改為府治見危素記

佛慧山寺一名開元寺

開元寺在大佛頭峯下舊名佛慧山寺山半皆峭壁

壁多石龕鑿如來像旁鐫宋人題名今崖崩不可復

辨府志

李攀龍詩流陰拂層岑返照翳深谷古寺入蕭條廻

巖抱幽獨梵影靜香臺鐘聲殷石屋絕壁棲禪頌懸

崖下樵牧秋花雨還瘦老樹霜逾禿寒泉可瑩心白

雲况極目登臨客自佳搖落時何速疏色蕩腥羶苔

光清簡牘新詩發神秀舊游耿初服歸來杖履便老

去烟霞伏高城出睥睨燈火通林麓言旋轉多興後

期此同宿滄溟集

皇姑菴都泉上石塔有開元字舊志

塘頭寺在神武西南寺前一塔有開元九年字塔東即

倘豆泉

華林寺正覺寺東唐天寶十年建

九塔寺齊城峪唐大歷重修

許邦才九塔寺記泰山北下麓野之間有地曰齊城
 有山曰靈鷲有川曰錦陽峯巒複合林蒼鬱距郡
 邑百里稱異境云寺建於此莫知其始歷考寺碑惟
 得唐天寶大歷之文為古然曰重修則猶非其始也
 意必建於隋梁之間而無稽逮我皇明宏治十三年
 重修九塔寺之碑而寺名有定徵矣今六十餘禩風
 雨銷鑠於是梓或就朽甍或就蝕飾之金碧畫之丹

黝類就凋落寺僧了謙惻然嘆曰物無常新功貴有
 繼不有名勝寺曷由興不有繕緝興曷可久乃肩其
 役費視其積以匱為期勞視其力以畢為期施聽於
 人無必募成聽於天無刻索經始於嘉靖癸未春告
 成於戊子冬功倍於剏製加於昔則朽者挺如蝕者
 瑟如凋落者煥如燦如於是視瞻儼儼禪梵恬恬鐘
 磬訇訇旃檀芬芬祈謁而集遊者繩繩闐闐客歲克
 登詣境斗絕色相岑寂曇靄毫光恍惚時出宜其僻
 而不廢也其塔一莖上而頂九各出構締詭巧他寺
 所未經有故寺名九塔因述其始末云

以上俱舊志

李攀龍錦陽川九塔寺觀許右史碑詩名山諧夙好
况復近吾廬嵐影浮斜照茲川錦不如空林雙樹老
寒塔九華疎一片頭陀石新文六代餘

滄溟集

甘露寺

泉瀘莊東有甘露寺唐貞觀時建今寺廢樵者嘗聞

空中木魚聲

舊志

永平寺

成化元年陳銓重修記寺建於唐距濟南郡城東北
二十里在卧牛山之陽釋性澄重修

碑據

觀音寺

正德八年馬雄重修記錦陽川左岐峪曰齊城寺曰

觀音唐大歷間肇建

碑據

瑞氣觀

祐德觀府城內唐碑云瑞氣觀宋曰天慶金改祐德
觀內古有扁鵲祠金人因創神農廟碑記存焉

齊乘

太清觀

楊宏道重修太清觀記畧金大定間全正之教始興
逮金遷汴大行之陰洪河之陽士族良民隨之南徙
散居於秦雍陝洛亳宋壽泗之間垂二十年壬辰金
潰士民獸駭鳥驚其有幸而脫於獵場之外者姓名

未附於大朝州縣之籍至無所容跡而且重罪當是時也郡邑山林道菴碁布智者前為高簪潤衷與道者同志咸免無所容跡之禍嗚呼天也蓋天假全正之教為渡人之航於數十年之前而能濟斯人於數十年之後嗚呼天也般水鎮在淄齊之間鎮之巽維有觀曰太清大定三年名額石刻存焉道士耿之沼及弟子王首銳主之師弟子相承者有年矣金遷之後戎馬不息相承者竄匿圓楹碧瓦委於榛莽之中權知濟南府事范智攝歷城縣事馬通主簿請臨淵崇源大師劉志蘊住持仍給田三十畝

斛以聚其徒乃始翦榛莽逐蛇豕扶傾覆漏增無補缺太清觀相傳創於唐毀於宋之季見名額於金重修於大朝開國之初師既沒弟子通正子耿志平白雲子李志端二人今掌其觀事著雍涪灘十月弟子李志端請余記之余欣然為之記

據碑

修

白雲觀在鑛村相傳建於唐元至元間道士陳志淵重修

興隆寺

林泉觀在弔枝山建於唐明嘉靖三十五年重修
興隆寺
乾隆十八年金祖靜重修記歷城東黃石莊有興隆

寺唐時舊刹也

大聖院

王繪大聖院記衆生以三毒業流浪生死海中盡未來無有已時西方聖人大慈大悲憫念有情廓為法航濟而扶之厥功大矣雖雙林示寂入般涅槃而應念化身至千百億譬如清淨水中月體皆現謹按濟南圖經老僧口鎮在聞韶驛東北七十一里後唐清泰二年建本小清河渡口嘗有老僧坐化因此為名又耆舊相傳有入滅老僧結跏趺坐沂流而逝其屍驚然至是遂止緇素神之相與遷置圖經

以謂茲必聖賢權化警悟羣迷乃構厦奉祀水旱祈禳皆有應驗此大聖院權輿之事也宋政和二年有旨自崇寧以前修建堂宇間及三十者特許存留住僧省靜以是訴於縣縣以是聞於府府給據付之至今以為證焉三年省靜以年耄請賜紫沙門智通住持智通為人質直精嚴長於梵咒眷言是院多歷年所其宇摧敗其地褊隘竭力化緣剏建增葺大殿法堂寮舍庖廩塑佛一龕冶鑄洪鐘以警昏曉增展鄰壤以崇垣墉度小師七人廣興廣文廣德廣峻廣實廣先廣寶濟濟踰踰皆有學行智通既老再傳而廣

峻佳之又再傳而廣寶住之近年以來昧者顯敝者
 振雕木莊嚴六師佛像丹雘粉澤金碧相照魚板鐘
 磬歌唄潮音琅琅不絕者皆廣寶住持之力也昔在
 皇統九年繪就試迴待榜之次胸次芥蒂一日先妣
 太君田氏謂繪曰昨暮夢自絡絲於張絲竿上火起
 方驚愕間忽見南寺大聖忻然而言汝子今歲必了
 此吉徵也不數月捷報登第式符其夢太君遂施僧
 伽黎衣以答靈貺嗚呼自非慈悲妙用福佐一方安
 能現化如是哉繪欲顯聖賢之靈跡故因書石云讚
 曰臺城之北灤水之陽鎮號老僧肇自後唐聖賢以

化於赫靈跡坐亡泝流理不可測緇素神之建立道
 場用作佛事基構漸昌歲月綿遠其詳靡紀所可見
 者省靜為始智通廓之廣峻承之或卑或陋廣寶營
 之棟宇彌壯像設益儼金碧莊嚴光輝冉冉楨椎不
 停苾芻有歸福佐一方法雨霏霏後之嗣者守宜無
 失刊諸翠琰永戒無極大定二十八年三月十五日
 少中大夫保德州刺史兼知軍州事王繪撰

以上俱
據碑

五代

禪靜院龍山鎮北建於後唐始名新禪後名中禪宋治
 平初名禪靜

舊志

王敬重修記畧金僊氏之教皇元崇尚尤甚濟南般水鎮之南有院曰禪淨考舜院之斷碑謂肇建於後唐始名新禪後名中禪宋治平勅其名曰禪淨迹名求實始其禪院歟源遠流分離為異門遂為教院院之主僧寬公大師禮山康大宗主汀溝淳公受法淳公之門學者百數莫之或先先是院闕前殿師乃經度營表掄材督工檀那之主不慮德色率皆懇布樂施不勞餘力而殿以成因摭其實而書之

水月禪寺北門內東祀觀音晉天福建舊志

王士正汎湖欲訪水月禪寺不果詩二首水鳥說七

佛偈霜鐘轉百法華五十六年如夢阿誰解算河沙

予以順治庚寅居此今五十六年矣

一笑世經千偈久署亭名四休又別湖中魚鳥七橋

幾度回頭蠶尾續集

洪福寺中宮東天福間建舊志

宋

大菴一名長春觀

正德三年重修長春觀記廢井中獲一斷碑有大觀五年初建字又有元至元四年八月提點高道謙知觀馬德逸重立之語宏治甲寅有義官蘇安鄉者劉

春薛謙王如山陳鳳倡修至正德庚午鄉人李海慨
正殿之傾且敝竭力新之據碑

嘉靖八年道士任永貴重修萬歷四十五年劉伯綬

重修同上

長春觀西門外邱處機修正處殿後平地一洞蜿蜒

數十里名為長春洞今没入民家一名大菴舊志

鍾轅長春觀詩樂源數武吾比鄰直北道觀名長春

古殿巋然地宏敞朱甍碧瓦如嶙峋翠栢槎枒多艾

納之而蜿蜒虬龍蹲玉案玻璃注淨水虔供閭苑清

虛神丹書金籙肅壇醮彭彭法鼓搥昏晨愧我僦居

幾二載終朝碌碌埋風塵偶爾行節避炎暑姑作半

晌逍遙身欣逢叔度家二妙才思卓犖顏斷斷入座

方瞳老道士黃冠白葛烏紗巾呼童汲井設茗具相

將古蹟閒究尋刺刺僂指為予說斯觀自唐芟荆榛

別號大菴我鼻祖元朝東海邱真人餐霞服日調胎

息歲早祈禱無其倫殷七七花紅似錦許閒閒永白

於銀迴廊左側穿洞口羊腸委折開迷津南山之南

西餘里洞尾小菴栽松筠大菴小菴相映帶琴高赤

鯉來回頻厥後尸解何處所天涯浩渺懷先民元都

在昔桃花盛免葵燕麥今沉淪憑弔當年共太息摩

浮石碣苔錢皴吁嗟仙家猶物化大塊為主儂為賓
世間萬事皆如此誰非假假誰真真蒙木集

按碑有大觀五年初建字詩內自唐云云恐訛

鵲山院

按陳師道登鵲山詩一作鵲山院詩見山水考

王革同錢翁遊鵲山寺詩今年客灤口兩過鵲山寺
來春放脚處一道酸風吹山徑石犖确畧約自孤寄
寺門黃葉深羣峯入蒼翠相將嚼空王低眉非無意
豈惜瑄璫人顏色為顛顛頰面老比邱策杖揖客至
茶烟疊數縷寒花紛相次樹轉夕陽黃促迫別開士

何當矍鑠翁拂藪尚題字出寺蝙蝠飛冥冥蕩情志

二十四泉

草堂集

朱懷樸登鵲山寺閣遠眺詩濟灤來王屋九點峯楚
楚碧流滌寺門樵風送寒雨上方秋氣深雙樹映孤
嶼初地意蕭寂古像留紺宇巖壑靜塵心松竹護茶
塢幽禽鳴空林黃葉積廊廡涼吹送夕景搖曳塔鈴

語山民集

劉伍寬題鵲山寺詩燕子飛相引飄然至上方松風
圍古殿花氣撲香堂解帶塵襟潤登樓澗壑涼機心
猶未息一局午陰長此亭集

東嶽廟

會鞏嶽廟祈雨文去歲之早有請干神蒙畀嘉澤田
 則大稔今春河役發民二萬更迭齋送衆又倍之蓋
 此齊人出者幾半迨其返室維夏之初勞費既深又
 違穡事夫民數歲乃遇一稔敝之如此其幾尚完今
 二麥方包而亢陽為虐吏任其咎所不敢逃惟民何
 事賴神終惠能致雲雨則實在神尚其念之
南豐類稿
 李珪重修東嶽行宮三門記畧歷山下有岱嶽行宮
 辛丑春三月有本觀住持道人充濟南路道錄李福
 道同老杜公法師等就基址重修癸卯秋八月帝宮

正室成有本府錄事司首領董俊龍水科針筆王澤
 社官雷澤同本觀住持道人正授圓明元悟正人法
 旨充濟南路道判周福正姚士英就正門故址於至
 正十七年三月間啟土民願施者謹趨之尅日而成
 并帝之宮室完舊益新却有油麵王德同妻翟氏管
 鈔一百五十貫作門戶并裝飾爰書其事於石
碑據
 周維貞重修東嶽廟行宮記畧歷城城南嶽廟劫火
 之餘基址是存重修建於前至元十七年近自至元
 庚辰有山東都轉運使周太中以課辦公務之餘為
 民祈禱遂割俸繕完煥然一新時則有提點張公輔

壽躬率其徒勤役相助遂能允成是不可以不紀據碑
 施閏章重修東嶽廟記古之事神者祀而不瀆敬神
 而不聽於神自天子至庶人各有祀典非其所祭則
 不敢祭所以明禮辨義也泰山為五嶽長書稱柴望
 岱宗巡狩於是乎始蓋天子所有事也其在境內惟
 魯侯得祭季氏矯舉孔子譏之况其下焉者乎是以
 古者五嶽視三公未有封號其從事泰山者有祭告
 而無封禪封禪之說著於管子而所稱七十二君殆
 不可考自秦漢迄唐宋好言封禪用是有宮觀祠廟
 之役且人其神而帝王其封號矣明洪武間始正其

名曰東嶽泰山之神有大事遣使奉天子冊書祭告
 雖未舉巡狩之典而與古柴望之義一也今去古益
 遠祭義不明俗尚禱祀士女重趺累繭影赴響臻趨
 事泰山無虛晷崇廟飾宇史巫紛若以覬覦其所欲
 得不幾以神為市乎濟南府治去泰山百里而遙所
 在多祀嶽神城南岳廟為甲昉自宋元歷明宏治萬
 歷增修至再崇正己卯災前提學余君倡義募修年
 閱二十費累鉅萬復其舊而廣之朱甍碧瓦棖椽巍
 峩左右層宮複殿羣神畢祀兩廡列諸寘曹善惡狀
 見者竦然髮立余秩滿將歸道士任德志及諸父老

丐文以記余乃昌言於衆曰此古天子柴望之所先
 魯侯之所守祀而大夫以下之所不得祭者也若毋
 以神食於我而謂神之假易也夫捍災禦患出雲為
 雨有功德於民者皆祀之所以答神貺也非諂也書
 曰惠迪吉從逆凶皇天無親惟與善人易曰積善之
 家必有餘慶積不善之家必有餘殃詩曰懷柔百神
 及河喬嶽福善禍淫天之道也敬鬼神而遠之智者
 之事也帝出乎震震東方也萬物之所始也岱為東
 嶽出雲雨不崇朝徧天下而此邦為嶽麓被澤尤先
 且厚宜不敢忘神之賜今竭力致誠雲集雷動入廟

中尊之如天地親之如父母畏之如雷霆可謂敬矣
 其反而思曰某事也善可告神某事也不善神必怒
 我恐懼修省相與薰為良善去其矯誣以告無罪於
 神夫然後風雨以時苗患用息豐黍稷而穀士女神
 所憑依將在是矣不然瀆神求福鬼瞰其室若毋以
 神食於我而謂神之假易也諸父老聞之憬然曰善
 遂書其辭為記順治十七年歲次庚子秋九月
據碑

壽聖院

英宗治平四年正月辛亥詔民間先私造寺觀及三
 十間者悉存之賜名壽聖
司馬光
稽古錄

龍洞北崖山如疊甃峯若城墉崖間有金刻勅龍洞壽聖院六大字為蘇軾所書下有寺即古院也

舊志

蘇轍齊州祈雨雪禱龍洞文惟神出入造化呼召風雲播灑甘澤膏潤下土今茲歷時不雨麥不得種饑饉既至疫癘將起守土之吏知任其憂而不知所為神能仁愛斯民又能作為雨雪以生育萬物是以敢告苟克有應嘉雪時降以寬吏民之憂敢不有以報

也尚饗

藥城集

李元膺順應侯碑記事有不相及而相資者天人之勢遠矣人所播種而天為之灌溉此豈理之可恃者

又其遲速多寡必如人意而後可今引機以灌園猶未必皆能以時而况驅風馭雷神龍之所變化而必欲如我節度此民之所以多怨而不合也古人於其力之所無如之何而為之祭祀禮文以寓其精誠之至以為誠之至雖遠而無不及而荀子曰雩而雨何也猶不雩而雨也夫荀卿氏好為異論以其一夫之所見而廢歷古聖人之事其亦不思而已耳今所在山川之神能出雲雨以利賴一方答民之求如響者蓋不可一二數是又可盡誣也哉濟南自春不雨夏五月旱氣彌甚通守何公攝郡事不忍斯民告病為

之廢食求可以致雨者百術並用最後禱於龍洞乃旋日而應郡人皆以公至誠所致公曰民則無罪而神所憐也我何有焉乃卜日率屬吏冒大暑往來馳八十里以民意告謝先是歷城令歐陽大春夢旌旗戈甲與衛甚盛云是順應侯見大春正色曰吾受天子封爵而制書吾不得見何也大春深駭之不得對覺而語其夢同僚莫有知者久之得於州軍資庫中塵埃敝壞乃元豐中守臣韓鐸以侯之事請於神皇帝而賜者蓋於今二十餘年矣公既以禱雨而應又得茲事異之即歸制書於廟且購大石刻之立廡下

而謂法曹掾李元膺曰神之事彰彰如此不可無所述恐久而遂以泯滅欲子之文以傳於後吾將並刻之元膺敬惟順應侯功德在人秉筆之士固願有所述也而龍洞為東方勝處亦欲見於文字而踰年於此願遊而不得既以祀事從公始獲一覽其勝巖石竒峭殊不類他山山行六七里岡嶺重複初若無路而境轉輒復恍然所見益竒自三秀峯之後四山回合皆壁立萬仞如削金鐵而巨石危峯橫出倒挂虎脫其頤龜瞰其首崢嶸輒崦如欲飛墮此天下之竒詭也世言昔大禹嘗登茲山起螭龍以理百川至今

民間猶謂之禹登山洞在山之脅其大如屋其深十有八楹視之窈然嘗有風氣觸人此固神物之所宅也天子既加侯以龍光而守土之吏又為之崇飾侈大以播侯之美於天下侯之美亦大矣侯其無替靈德時其雨暘以大庇斯民於無窮民亦得以簫鼓牲餼奉侯之祀益遠不懈其不亦休哉元符三年六月

十三日記

碑據

張泰亨新修龍洞靈惠公廟記自古齊州東方一大都會也近改曰濟南府府治之東南行三十里許山益峻路益□□盤折自西而少北阨入深谷叢薄

覆翳僅可容足其間懸崖絕壁突兀萬仞層巒疊巘蒼翠如畫有曰錦屏嶺者有曰演老嶺者有曰三秀峯者有曰獨秀峯者□□山也山腰半空洞口呀豁陰飈盪胸晦電擊目近之則不覺使人毛髮竦立者乃龍洞也洞之石或有時而雲曾不膚寸倏然而變黷洞之泉或有時而雨曾不涓滴忽然而霏霈若非神物是宅其變化之狀其能如是之速耶山之下有古刹焉名壽聖院而龍洞寓於其中方膏雨不時禱無不應在圖經文字皆所弗載逮夫宋元豐間有太守韓鐸者因冬禱而靈尋奏乞加封號以答神休蒙

錫以侯爵曰順應順應之異迹已見於元符中通判何維碑陰記厥後進封以公爵曰靈惠靈惠之封不知始於何代何年耳止於獨秀峯下有石刻題曰南陽韓公美禱雨於靈惠祠時皇統辛酉暮春十三日也皇統蓋前金之年號自宋季迄於金亡百餘年間神之靈驗無復聞焉國朝奄有天下州縣皆世其官我濟南路大行臺清河公先以年高引退傳爵於其子蒙宣授濟南路都總管民長官者即嗣相也嗣相在庚戌歲方北覲闕廷未回值春夏大旱穀價翔貴民有流亡於道路者一日大行臺公召參議段徽權

府秦和謂曰旱既太甚無術以可救嘗聞諸故老曰府南龍洞山有龍洞至靈吾老矣不能行禮汝等其往禱之無怠於是府司僚屬迺具禮以祠是夕大雨盈尺明日雨亦如之衆皆入賀於公公曰神貺之孚我何預焉若輩思其所以報之之禮當如何哉僉曰昨見神宇庳陋廟貌摧毀其不副邦民瞻仰奉祀之意若能一新之不惟少慰民望而神之格思亦莫不喜公曰然乃命官鳩材僦工使匠氏輸其能役夫竭其力不日之間新廟奕奕神像赫赫金碧璀璨煥然可觀公乃率羣官具牢醴以享是歲百穀豐登卒滿

西成之望焉無何至今歲甲寅春夏之交雨復愆期
麥將秀而半枯穀欲種而未下衆口磬磬靡不愁嘆
適嗣相以不可風之疾未起視事廼命世子開躬詣
靈祠以禱之是時簪纓多士閭巷細民緇黃巫覡之
流耆艾童孺之輩偕陪從以祭既歸路未半沛然而
雨三日之中甘澤霑足物以是生民以是喜翌日復
往謝之如初禮已而世子謂幕守張泰亨曰是雨之
降也民皆歸功於我我豈敢當之哉是豈知皆吾祖
吾父潛祈默祝之心使我奉行之致有如是之應耶
今已令歷城縣錄事司官春秋修祈報之禮以為恒

典八廟之制度未備者悉加修飾又欲礱石以記之
使千秋百祀而下咸知神之德有應於人亦使知吾
祖吾父之德有感於神也君其為我文之無口余因
拜手而言曰夫大而天地幽而鬼神微而昆蟲草木
之類若以精誠之至動之未有不如其影響而應之者
而况妖祥之致休咎之來莫不一根於人心雖旱災
天數也古所不免如成湯禱桑林而自責宣王望雲
漢而益懼皆能以誠心致感曾不旋踵轉禍而為福
矧餘人可不如是乎今世子銜父之命深民之憂徒
跣奔走曲拳擎跪而哀告於神明神其應之也如此

不亦懿乎故祭法云山林川澤能出雲雨者則祀之
有功烈於民者則祀之今靈惠之功於斯民也非淺
矣其命有司以歲時致祭其報之也亦不為薄矣若
夫始接之以誠終事之以敬誠與敬惟君子能盡之
世子之心可謂始終無愧矣然而當薦饗之期犧牲
豐腆粢盛精潔雖百禮孔洽苟不揄揚神之休德以
侈其賜神其饗之哉所以載芟良耜之詩播於周齋
房象瑜之詩興於漢茲亦宜作迎送神之歌以侑祀
事庶神聽嘉之福我齊土之民無有休已也故繫之
以歌其辭曰
口路盤曲兮山之隅
林麓掩霽兮神所

居神之來兮風徐徐雲幢烟盖兮羅前驅
陽侯執轡兮列缺捧輿電不搖幟兮雷不鞭車
亦既至止兮士民敬趨擊鐘鼓兮吹笙竽獻嘉肴
兮酌清醕陳牲奠幣兮翼翼愉愉自今以始兮歲
不虛神安寧兮樂有餘時暘時雨兮咎徵悉除多
黍多稌兮豐年可書民之昭事兮禮不敢廢神之
陰施兮福亦來儲據碑
黎國器重修龍洞聖壽院記龍洞距歷三十里許
四山迴合若無路然由山口而入巉巖危峯四壁
若削且丹碧點綴絢若錦繡故一名錦屏山山脇
一洞捫蘿上之其大如屋其深十八楹可明火而遊
洞下為

靈虛宮早禱輒應宮北雙壁若劈水澆澆中出曲行數里為黑龍潭雲氣簸揚渺焉際空蓋神物所宅也在勝國時尤崇異之珠宮寶刹金碧相輝清梵鍾磬響振空谷勿論持辯者錯趾跨酒瓢而遊者輪蹄不絕蓋達人之大觀也即如我朝肅穆之世殿宇依然山不改色青衿且多卒業於斯迨神宗卯辰之祲盜賊沸起僧不能居而一切盡屬烏有己未秋余同唐郡丞禱雨立應竊有志焉而束於吏法未敢首事庚申春中丞王公侍御陳公觀風過此見其山勢竒絕相顧而嘆曰田海陵谷代而變遷時和物阜桑井亦

太平之觀財盡民窮山川皆黯淡之色景自天開物由人勝我輩寧無責耶遂捐俸三十金大為修葺其有未敷余以俸錢佐之自大士殿以及山門皆煥然一新復建圓亭者一俾酒遊者有所依由是山若增而竒焉不越月而事竣矣昔李格非以園囿之興廢卜雒陽之盛衰名山從此吐氣則歷下其興乎是役也兩公豈獨留心景物已哉

碑據

周有德重修龍洞靈惠公廟碑記畧康熙三載之間民用大和予以癸卯秋出撫茲土越明年甲申夏六月不雨爰命有司修大雩之禮公偕予致齋步禱者

久之雨未至聞諸父老云會城東南三十里有龍洞山相傳宋元時所祈輒應遂率百職事吉蠲以往祈禱甫畢雲氣驟合歸及半途大雨遂至翌日又雨四郊霑足鼓舞載道顧仰瞻廟貌既庫且圯何以答神庥而崇祀典於是鳩工庀材不趣而速唐皇既闢兩廟落成夫斯廟之創不知何代考諸羣籍宋元豐二年守臣韓鐸以祈雪請於朝始封順應侯元符三年通判何維禱雨刻其制書於後其晉爵為公改稱靈惠則見於金皇統韓公美禱雨題名至元總管張開

三世守齊復以禱雨令叅議張泰亨記其事穹碑猶存焉與今日之事若合一契予讀而嘆曰神人一氣也此以誠感彼以誠應孰謂古今人不相及哉百執事請礮石為記敬拜手而為之銘康熙三年歲在甲辰秋九月吉日

據碑

范瑟遊龍洞寺詩荒寺丹青古寒泉野殿深龍游天表去洞向石巖陰座外明珠水林間聽梵音何時起支遁相對法華吟

舊志

李攀龍游龍洞寺詩壁削芙蓉萬仞丹禪林隱隱畫圖看人間勝地僧多占洞裏諸天客到難雲傍龍來

晴作雨風從澗底暑生寒年來臘有烟霞癖石畔長
松好挂冠

滄溟集

張穆游龍洞山寺詩千巖萬壑路縈迴却度前峯寶
殿開四面好山疑禹鑿半空飛瀑自天來雲歸洞口
龍初蟄雪滿松枝鶴未回共道塵寰那有此臨岐上

馬重徘徊

石刻

報恩寺在龍洞東峯元豐二年僧宗義建

舊志

淨居寺東關外肇於宋毀於元重興於明

會仙寺平陵城東一名東窪寺宋建元修

雷音寺史家塢一名釋迦院宋建元修

朝陽寺城東南六十里宋大中祥符初建

以上俱舊志

興福寺

王綸重修記畧寺肇於宋毀於元季兵我朝僧修忍

等復修之宏治乙卯秋七月立石

據碑

彌陀寺

成化五年重修記畧歷城之北華山之陰逾大清河

鄉名南會清寺曰彌陀創建於宋之時今二百餘載

檀越郝安崔祥謀更新之經始於成化丁亥三月落

成於今年八月

據碑

劉伍寬訪彌陀寺詩行脚小乾坤沿河問寺門霜風

催木葉野水落堤痕勝地餘殘碣浮生慚世尊歸途
猶未晚回首識前村海右堂集

永興觀柳埠東南大定重修今名岱密菴舊志

元

靈泉菴在金線泉上見濟南行記詳山水考

呂公祠

元遺山在太原有道人嘗邀同食且曰吾家在濟南
趵突泉上甚可樂也子能從吾遊乎元曰有待數年
後遺山過濟已忘前約矣游泉上倦卧灤源堂忽夢
前道人揖之曰久約不相憶耶何咫尺不枉顧醒而

始悟因起過北岸入祠中儼然座上矣因為重建此

祠舊志

按濟南行記不及此事舊志不知何據

呂仙閣在趵突泉上平視千巖下臨巨壑泉聲激玉

六月為寒府志

天齊山神廟在府城內齊乘

按漢志濟南國治東平陵有天山郡南山也以其在

齊故曰天齊同上

清河寺河趙園東北元修舊志

正容寺藍家莊東元修

龍泉寺唐王道口元修

華嚴寺馬蹄峪元建今廢

平臺院老僧口西南元修

清寧寺城東北五十里中統間重修

興教寺箭桿裏中統建

華嚴院在南寺莊至元間重修

丹陽觀一名大菴馮中和修正處至元年建

南泉寺在中宮東南元至元中重修明萬歷己卯許邦才重修

許邦才重修記南泉寺在省會南四十五里中宮之

山陰之半寺迤南出泉三四泓冬夏不涸故名其
叻蓋久而不可詳但南崖巔有石刻至元重修字乃
知不始自元矣至我朝正德時重修已磨石未刻而
其人已不可考及萬歷戊寅予以老病火馳求就陰
之地以息乃市寺僧房地一分相度經營之宜則殿
宇頽敝像設汙殘長太息者久之因語寺僧曰是任
將安諉哉於是命工鳩材埏埴既稟次第修葺至己
卯春正月告成而寺視前改觀矣寺僧湛徹等募緣
遠近善信多所施助具有名氏恐久而磨滅先於南
崖得石請紀歲月及歲之三月來山村齋居因為叙

述而綴數語於左方詞曰東岱良趾列刹相望寺以
 泉名其源蓋長始自王屋滙為清濟經河伏地紆迴
 千里乃於是中瀉為泉泌自南暨北七十有二曰都
 曰醴曰勞曰糠在彼南山實為濫觴寺有廢興泉無
 絕續因泉名寺實有攸旨爰惟此役有其舉之我來
 匪暮殆俟厥時元度前身安知無自似於今日了未
 了事

迎祥宮在府治西南元至元十年建明永樂中重修
 岱嶽觀南門外嶽廟東大德重修

栢山寺在展村西至正間重修以上俱舊志

嘉靖四十年李賞重修記畧云寺不知肇自何時元
 末毀於兵燹正統丁卯僧行鑿重建成化間鄉先生
 中丞張公鵬讀書其中為時名臣學者因稱栢山先
 生自是而後如閻函麓錢梧史趙雙松劉近峯徐北
 塘何月巖趙陽名賈竒峯趙一元一貫周化中周之
 紀李茂華趙時煦馬宇謙皆讀書此山而有聲於時

碑據

醴泉寺在中宮南一名四合至正間重修舊志

釋迦院一名汀溝院同上

釋智登重興釋迦院記畧釋迦宗主忘機顯教大師

諱福淳于其姓河間路滄州樂陵縣人至元八年尋勝至歷城之東三十里汀溝古址曰釋迦院樂其遠囂塵駐錫為歸宿之地竭力營修制度俱新又罄餘帑藏剏良田以可菽置畦圃以可蔬常住歲計及十方雲水之給至是足矣嘗從師聽講見師議論風湧出入三教貫穿百家其言文而正其行峻而通遂為

據其事實而筆之

碑據

升果院在董家莊至元重修

舊志

王炤勝果院僧明通勒績碑記畧濟南雄藩甲於河朔路治之東五十里無影山其下有院曰勝果院與

自榮公山主殘金滅時由河南行脚至此卓錫功德王大檀那縣尉孫福巡檢曹誠張都統馬千戶眾等同發善心創建後數十年殿舍崩摧孫顯曹政與當時嗣院事僧文輝重修厥後數十年至知院僧明通觀殿宇傾圮輒發虔心鄉村耆老悉欣然嚮應經營之始逮於落成不閱歲而畢約費楮幣萬緡有奇

碑據

康和尚院明初改為鎮安院又名鐘樓寺

鐘樓寺府治北僧綱司舊在正覺寺成化間移於城內鐘樓之側建佛殿藏經殿為別院因鐘樓遂名

舊志

鐘樓寺大明湖南後改湖南書院已又改為提學院

公署

同上

陳修鎮安院鐘樓記畧在天齊昏曉者惟日月在人
 事齊昏曉者惟鐘鼓故藩服郡縣皆置鐘鼓剖昏曉
 齊庶政濟南扼齊魯之要衝當海內之劇郡洪武建
 元天兵下斯土闌闌之廬舍釋老之寺宇一無所毀
 是歲山東行省提刑按察司皆設於此焉冬十二月
 修躬承德音出牧茲郡時有旨建有司公解明年已
 酉二月修到官經營之顧開元寺基高爽舒廣乃稱
 圖式遂大興徒役府治適成舊有鐘樓居府之左翼
 郡民咸請移置他所以工大力難未許會三年上以

曰召守臣入京廷對七月修還郡父老所請益堅

築章邱鄒平二縣夫二百餘人木石瓦墁悉皆宿備

旬月鐘樓遂成去府治僅一里與鼓樓峙立飛甍曲

楠丹雘焜煌露箔風鈴低昂有次萬家之衆勉勤作

業朝夕聞鴻音於星月之下以樂雍熙之世豈不偉

歟樓用康和尚院舊地築臺三層上立棟宇四級葺

舊殿若干楹移梵王相改名鎮安院相是役有成者

推官姑蘇丁公英經歷廬山陳汝言知事雲川莘景

尹脩不敏請以是為記時庚戌洪武三年冬十有一

月己丑初吉立石

據碑

衛既齊重修鐘樓寺歲時久遠日就頽圯康熙二十有八年余乃作而新之庀材鳩工擇吉創始未幾而樓巋然步櫺周流長廊四起高覽遐矚山水人物城郭邑居之盛鱗次坐湧於眉睫間樓與鼓樓對峙洪鐘在縣考擊相應於以辨晝夜之候嚴啟閉之節亦都會所宜也

府志

孝感寺明初改名太平寺

太平寺在府城內西寺前有孝感泉滙而為池曲折引流入僧厨復流出垣達於北渚正德間重修德府

出內帑助成

陸通志

元孝子劉琮捨宅為寺以得金名孝感後鐵方伯於

中貯兵甲改今名

齊音

湖旁有寺曰西寺一名太平寺

又下名勝志

鄒襲修太平寺記畧濟南在城之寺有三太平寺其

一也山門佛殿翬飛岌立後有修竹千竿拂雲蔽日盛夏不知炎暑為棲佛奧區都綱至昂之所為也至

正德丁卯六十餘年風雨震凌漸至頽圯德府內官

楊玘重修大殿東廊本府醫官張雄乃語承奉正鄧

芳啟於賢王殿下即出內帑若干再修西廊凡其所

居狹者闢敞者新經始甲戌之夏落成丙子之秋故
詳記之碑據

明

正覺寺舊在府城內永樂間移置舜田門外陸通志

寺舊在府城內名曰開元國初更名鎮安院正統間

勅賜藏經成化間移舜田門外始易今名崇正壬申

火藏經雖毀大雄殿獨存僧綱司今在其內舊志

光廬重修正覺寺記畧歷城出自歷山門轉而西三

百步舊有寺曰正覺蓋自勝國之前至元九年府城

之內有寺曰康和尚院迨我朝洪武之三年更名

安院至正統十年間則嘗奉勅命頒賜大藏經貯之

以肄僧徒後成化十一年德莊王分藩我濟南唯此

刹適當府志前壇壝處有司始計值遷正覺寺是役

也增其式廓眎昔而既張矣百年來日就圯壞都人

士馬進良王宗仁王志臯季秀周居審周居珍等僧

能敬法辨德淨等僉謀新之未周星告成事已三豈

子索余言余聞之曰天下同歸而殊塗一覺性一源

歸之同也因應變化塗之殊也既自漸乖而權分

根塵結而境亂世儒惑於末流不究歸之同而病塗

之殊猥云佛氏異端此與以耳食何異余自弱冠睹

貝葉則昏昏莫辨既壯有所聞則心開然而遭口語者數矣因正言之以明至道時萬歷十四年歲在丙

戌秋八月

據碑

玉泉寺在龍集山一名果老菴正統十二年重修

據碑

元帝廟

尹旻重修元帝廟記畧我德藩賢王之國以來上下莫安乃於宮北土山之陽建北極一廟歲久傾圮於是慨然增修規制視昔有加地乃白雲樓舊基遠有佛山之巍巍近有源泉之混混背有明湖之浩浩旻老矣不能文謹跋數語於碑因申臣子頌禱之意舊志

元帝廟在趵突泉西成化間尹恭簡修建

北極廟在北城內迤西大明湖上祀元武亦以名臺

劉天民正武廟啟聖殿記畧濟南城城北會波門舊有

正武祠枕其上據城而言適當元武之方又水宅幽

隱龜蛇爰安望之鬱然有靈氣成化初年我德莊王

封藩於濟歲加葺理既崇且煥繼今王嗣位靖恭有

服祝釐飲福之暇勤恤民隱聞道家者流謂神有父

母宜更崇一字以棲神止王遂從之別為殿四楹繪

像以祀是固未可輕誣有神而一念愛民憂國之雅

良可欽也愚不敏因序其事爰作迎神二曲云望望

兮丹霄冥冥兮元圃神之格兮無射靈之萃兮惟祐
 庭奏兮九韶階陳兮萬舞滌蕙兮冰漿羞鳳麟兮
 醢脯篆寶幄兮流氛湛金壺兮椒醑騁極目兮招搖
 想容與兮羈羽神來兮無繇紛藻蓋兮璿旂儼帝降
 兮黃收駐仙馭兮紫印森庶府兮水衛明御仗兮天
 矛受王國兮祈福撫庶士兮總繇時燠寒兮歲熟銷
 兵火兮民懷願眷命兮用懋冀申命兮用休以上俱舊志
 王慎中游大明湖晚至北極廟登覽詩春城足遐觀
 攜手復嘉客欲極高深趣停橈理輕策林木飛鳥還
 蒼茫烟景夕返照射巖丹遙空烟水碧山色晦彌明

人聲喧更寂燈火起閭閻漁樵散原澤當歌浩思盈
 對酒沉憂釋不知驩娛滯天表生皓魄遵巖集

劉勅北極廟詩廟貌鬱崔嵬溪雲護法臺凭軒雙目
 豁倚檻萬峯來樹影孤帆動香烟古殿開喜看載酒
 者一棹任徘徊舊志

高鳳翰夜月泛湖登北極臺詩孤臺鬱起水雲間上
 界仙宮迫閉關袖手人依清漢立凌空心共野鷗閒
 花香高沁天心月夜氣平沉郭外山呼吸正堪通帝

座滄浪歌罷不知還南埠山人集

文昌閣在羅家寺山前成化間建舊志

三官廟

任文獻重修記城南三里許古有三官廟正德十一

年乙亥重修

據碑

天青菴在史家塢嘉靖間建

舊志

雲臺寺在桃花嶺東一名天井依澗築臺依臺築寺下

有甘泉石閣重重盛夏無暑

同上

李攀龍詩古寺馬蹄前荒山斷復連階危孤石倒崖

響亂泉懸喬木堪知午迴峯欲隱天不因許元度誰

得此攀緣

滄溟集

許邦才詩千峯寒色照驢裘歲暮還堪載酒游初宿

南巖天井寺便聽一夜石泉流

舊志

月陽寺在黃臺山上隆慶三年重修

藥師寺在權富莊萬歷間建

十方院在南門外萬歷甲辰建

廣勝菴在小教場萬歷間建

淨業菴一名雙橋寺在壇開北萬歷末建

星宿廟在南門外萬歷末德府創建

藥王廟在趵突泉西萬歷末孫方伯承榮建

劉勅藥王廟記畧夫穀以養生藥以療疾所從來遠

矣昔孔子每飯必祭今世藉刀圭扶衰病而不祀及

先代治藥之人報本之謂何方伯孫公善病每病藥即起於是蠲俸錢為一宇於趵突泉之干肖神農於上以岐伯韋藥王配之而雷公秦越人長桑君淳于意張仲景華陀王叔和皇甫士安葛洪孫思邈列於兩廊採山合冶毫不煩民間甫閱月而告成焉且治地一區以供黍稷乃屬記於余余因為之記曰古醫師掌醫之政聚毒藥以供醫事歲終十全為上十失一二次之十失三四為下至鄭重也今之醫明不辨寒熱平毒之性知不諳君臣佐使之法惟以情度病多其物以幸有功譬獵不知免廣絡原野以冀一物

之獲寧不為古名醫之罪人哉於是知今日之役又匪第報本已也萬歷四十三年歲次乙卯月日

大佛寺在八達嶺下寺去嶺三里佛去寺七里

渴馬寺在西渴馬莊崇正初重修亦名玉泉

萬善寺在鵲山下崇正乙亥曾司璫創建

普門寺在道溝內崇正十年張洪重修

梵音寺在龍山鎮明朝建

安閣寺在譚城驛東北一名草寺明朝建

以上俱舊志

三元宮

王做大佛寺重建三元宮記畧自歷山門出彌望皆

山林其峯巒之糾結雲樹之掩映入愈深景愈奇遇峭壁懸崖猿攀蛇緣人行樹杪去城若干里有寺曰大佛谷深土肥泉甘草茂余二子賞其靈秘讀書於此時亦有棲正緇黃隱見於朝烟暮靄間釋太正飛錫而來依樹梵唄積苦精修有山人進而告之曰吾土有三元宮者奧區也創廢不可考止餘敗瓦頽垣矣師有意興復吾率子弟荷鍤以待乃鳩工庀材以次落成於是丹堊錯落山川生色矣是役也經始於天啟七年九月二十二日落成於崇正五年六月十八日爰勒貞珉以垂不朽

據碑

三皇廟在城外東南隅

自此至聖水寺創修莫詳以俱見舊志姑附於此

晏公廟在北門內晏公水神上臺下券乃會波晚照所由名也

火神廟在南門外崇正壬申十二月二十一日大火二日士民祈禳雲集德藩重修制復峻麗

張仙廟在北極廟東一在嶽廟後一在龍潭西

黑虎廟在東南城濠上懸崖下有泉匯為池廟翼其上其一在鵲華橋西

速現司廟在西關驢市北內祀張桓侯包孝肅廟前有坊

二郎廟在東門內兩隅頭西北

靈官廟在布政司西東向遙與關帝廟對

白衣菴在水月寺西

傅家寺在程家巷東

興福寺在高橋一在橋頭一在大新莊

丈八寺在溫家莊

紫微觀在柳埠今廢

太微觀在中宮東一名柳泉觀

崇寧寺在孫家閘西一在任家岸

宗教寺在懷家窪東

白雲寺在方家寨前

福聖寺在梁家莊

觀音寺在祝店一在甸柳莊一在鴨王口

釋迦寺在埧子屯東一在小官莊

三教寺在韓倉一在殷千戶莊一在小周莊

萬福寺在新店

洞正觀在展村今廢

普光院在老僧口

崇佛院在千佛山下崇宮廣宇勝壓南郊東有廣嗣巷
每當令節士女如雲俗名下院

興國寺在任家岸河東

報恩寺在灤口

毘盧寺在田家莊一在曹家館

香山寺在泉瀘一名甘露今廢

千安寺在黑山家東南今廢

崇興寺在楊家寨西今廢

棲霞觀在龍山鎮南

玉虛觀在左家莊

水潮菴在趵突泉東高臺聳峙踞山水之勝內祀觀音

大士額曰水月清境亦曰金地院

雲水菴在道溝內今廢

朱老菴在荻子峪

陰泉寺在城東南龍峪

廣嗣菴在速現司東

菩薩菴在柳埠東

八仙菴在馬跑泉東西營南巷

彌陀菴在姜家莊

鄉義寺在黑龍峪西頂

聖水寺在東務雞山下今廢上一石礎猶存

國朝

甘露禪林在西門內順治初建採訪

毘盧菴在西關順治九年建

慈仁院在布政司街康熙初建

準提菴在西門內康熙初建

圓通菴在撫院前康熙初建

昇陽觀在大明湖西南道士劉某建

三元宮

孫光祀重建三元宮記畧會城南郭外正覺寺西三元宮為泰安武舉人張所存重建舊宮在趵突泉西肇有明正德間

十方院在南灘頭莊僧悟空建康熙庚申重修

聚德院

趙國麟新建聚德院記畧佛山下聚德院乃浙江張舜儀子希棻等建之以成父志者也舜儀性好善哀鰥寡振困窮力所能為孳孳不倦晚年欲建廟以祀神力不逮及屬續時特以命其子希棻等卜地南營建諸殿閣予既稔悉舜儀之篤於善又嘉其子之能成父志也因詳誌之時康熙五十五年歲次丙申

天主堂在高都寺菴今廢以上俱採訪

張篤慶歷下雜詩天主堂西西域胡行人猶解說耶

蘇烏斯梵唄來重譯回鶻衣裳徧九衢造化小兒藏
繡幙壺邱仙客入元都名區像教紛綸甚妙相金輪

竟有無

崑崙山房集

